


DIMIINU KADYÀKUPYÀNA

PÀMWÈ NÈ CIZUBU NÀNSHA

 Twasàkidila wa manza tètè, Mwanèètù Demos. Nènku mpindyewu tudi ne disànkà dyà kwikala kaaba aka mu dindà emu, ne kutèèlejaku majaaniki malenga ônsò a kùdì bantu bàà maalu malenga aba aa. Nènku mpindyewu, tudi batwishiibwe ne Nzambi neàtungunukè ne kwikala neetù ne neàtùbènèshè.

² Mpindyewu, dilòlòlò edi, ndi ngumvwa ne bìdi bikèngela bwà mèmè kwakula dilòlòlò edi, bu Mukalenge mwà kwanyisha. Ki mèmè kulòmba Mwanèètù Shakarian, kwènjì katanci kakesè, mèmè ne: “Mpindyewu, kùumvukù bikutàcisha to. Ndi mumanyè ne bìdi bikèngela bwà twètù kupàtuka mwab’ewu pa dībà dikùmi ne ùmwè kàdi pààbi mèmè—mèmè ndi njimija ànu cyumvwilu cyònsò cyà dībà pàndi mbàndà mwab’ewu.”

³ Mbimwèke ànu bu ne bakwàbò bònsò bàà kutùdi ki mùtùbo. Tudi tuumvwa... Bātu bàmba ne: “Tusunsa tùbìdi, tusunsa tùsàtù, anyì...” Mwanèètù Smith, udi mumanyè’s, aci’s ncikolè bwà kucyèenza mu tusunsa tùbìdi anyì tùsàtù. Ne mèmè ndi mumanyè mùdibi, ne ndi ngumvwila muntu ne muntu luse. Kàdi tudi mu cikondo cyà dibala dyà mèbà’s, mutùdi tusanganyiibwa. Tuyààya ku Cyendèlèlè, kàdi mutùdi mpindyewu emu mmu cikondo.

⁴ Ki mèmè ne: “Mwanèètù Demos, ànu pabwìpì ne dībà kukùmbanadi, kùumvukù bikutàcisha to, ùnkòkè ànu mu kàzakù cyanààna nènku nèmmanyanè ne ki dībà dyà kwimanyika.” Mpindyewu, mèmè ncìyi mujikije to, nènjikijè dilòlòlò edi. Pa nànkù mèmè mujikije, èè, ndi ne cyena-bwalu cipyacìpyà bwà dilòlòlò edi.

⁵ Mpindyewu kumpàlà kwà twètù kubuulula Mukàndà, twàkulààyikù ne Mwenawù, biikàle ne mitù yètù miinyika.

⁶ Taatù wa mu Dyulu munanga, tudi tuKwela twasàkidila mu dindà emu bwà didisangisha edi, bwà bitùkaadi bumvwè. Bu byòbi bikèngela ne twàmbè ànu dibènesha dyà kutangalaja naadi adi mpindyewu, Mukalenge, s’tudi bafwànyine kudyumvwa ne bìvwa bìmpè bwà kwikala kaaba aka. Pa nànkù ndi ndòmba bwà Ùtungunukèku, piikalàbi bìmpè ku mèsù Kwèbè, ne ùtungunukèku ne kwikala neetù ne ùtùkwàcishèku. Nènku mpindyewu tudi badisangè banyùngùlùkile Dìyì. Bu mutùdi badisangishe mu bwobumwè bwà muntu ne mukwèndè, biikàle tuumvwa majaaniki a by’Ùdi mutwènzèle, mpindyewu enzàku bwà twàlukilè mu Dìyì tujandulè ne mpenyi pàdi byònsò

ebi bifùmìne. Dìbà adi, aci neciikalè dishindika dyà bitùdi tudyùmvwa ne tumòna, byènzeka leelù ewu ebi. Fìlakù bintu ebi mu Dìna dyà Yesù Kilistò. Amen.

⁷ Mpindyewu, mèmè bu—bu musadidi Wendè, ndi—ndi muswìkìibwe ku Mukenji. Ne misangu mikwàbò bàtu bangumvùmvwe bibi bikolè, mu bikondo bishààle, ne pàmwàpa mmwìkalàbi misangu yònsò. Kàdi ncitu ngamba maalu mîngà misangu bwà kwikala—bwà kupanganangana to, ntu mbyàmba bwà kwikala ne meeji matòoke. Ne mèmè ntu munangè kwikala kwamba cîndi ngeela meeji ne ncyà bushùwà aci. Muntu yònsò ùdi ne—ne bukenji ku bintu abi, bwà kwamba mmwènu wendè sungasunga. Ki bwà cinyi ndi nsanganyiibwa munkaci mwènù.

⁸ Ne Mwanèètù Shakarian, wàkula bwà twartà twà disambila mu milongo yà babèèdi, pa kumòna bìdi Nyumà Mwîmpè. . . Mpindyewu, kàvwa wàmba aci bwànyì mèmè to. Mbwa Nyumà Mwîmpè, bwalu mèmè kî ngudi mufwànyine kwenza abi bintu to. Muntu kanà yònsò ewu mmumanyè ne, mèmè ncyèna mufwànyine kubyènta to. Kàdi—kàdi alu nduseke lwà mu bukesè, binùdi numòna apa abi. S’bivwa bikèngela nwènù kupàtuka kuya mu mwaba mukwàbò, ne kutàngila mùdìYe ùdyànjila kwamba maalu! Ne ndi. . . bintu bìikalà mwà kwenzeka, bìdi, ebi bìdi ànu. . . nwènù, nwènù mbàdi bènza ebi. Nwènù mbàdi bìitabuujà Nzambi.

⁹ Ne—ne pashìishe wèwè kùyi mwitàbùùje Nzambi to, ùvulukè ne, Yèyè ùdi ùkwambila nànkù, pa cibùmbà cyà ku cyambilu apa mene. Ne wèwè mu mpèkaatù, Yèyè ùdi ùkwambilaci. Ne bintu byùdi mwenzè, ne bìvwà kabìyi bikèngela bwà wèwè kwikala mwenzè, Ùdi ùkwambilabi. Kî ng’ànù bìdiye ùfùnda pa kartà kàà disambila to. Yèyè mmufwànyine kufùnda pa kartà kèndè kàà disambila. . . Kì mmufwànyine kwamba, pòpò apu, ne ùdi “ngènzàmpèkàatù,” anyi mukàji ewu “mmusòmbe ne mulùme udi kàyì ùkèngela,” anyi bikwàbò to. Ne yèyè kààkuswà kufùnda aci pa kartà kàà disambila apu to, kàdi Nyumà Mwîmpè ùdi ùbàkula aci nànsha nànkù, nwamònu’s. Nwamònu anyi? Nènku bìdi. . . dìbà adi mu mùshindù wà. . . lu—luseke lwà lutàmbe—mfùkilu’s, balùnda bàànyì.

¹⁰ Nènku ndi ngamba nùnkù ne buneemè bwònsò, bwalu katwèna bààbùngì kaaba aka mu dindà emu to, ànu kasùmbù kakesè cyanààna. Cidi cinkèmesha’s, mu mùshindù wà cimbìndulula bikolè, ndyùmvwa mîngà misangu ànu mwà kwela mbilà mikolè. Nènku pàndi nsòmba pa mwaba kampànda, ku lusekè lwà mukùnà, kùndi mpicishila dìbà bùngì cyanààna, mpetelakù maalu kùdi Nzambi, mpwèka ngaabànyina bantu cidiYe mumpèèshe mèmè aci. Nènku ncyèna—ncyèna muswè kwikala mpanganangana ne bantu to. Kàdi pààbì, bwà kwikala ne meeji matòoke, bìdi bikèngela ngiikalè ne meeji matòoke kùdi Nzambi, nwamònu’s, ku—ku Mukenji.

11 Nènku mpindyewu tudi, bu Mukalenge mwà kwanyisha, tudi tudilongolola bwà kuumuka kuya mu lwendu lwà dyàmwàmwà dyà mbù, mu matùkù makesè cyanààna emu, ne cyôci diswa dyà Mukalenge. Ncyà bushùwà ne ndi ndòmba masambila ènù.

12 Nudi bàà maalu mîmpè be! Ndi nditwa mu dyakula, mpwà mwoyi byônsò byà dîbà abi, ànu mutùdì bônsò twenza amu. Kàdi Mwanèètù Shakarian, ne bambi balenga bàà dikèmà bàdì pa cibùmbà cyà ku cyambilu aba, ne kwônsò aku, ne nwènù bônsò balundà bàà Yesù Kilistò, ndi nnwèla kààlumbandì mu Dîna Dyèndè; mèmè bu—bu cilongo pāmwe neenù, ku nkùrusè, kùdì Nzambi, nwènù bu bānà bèètù bàà balùme ne bàà bakājì.

13 Ndi muswè kubuulula, mu dindà emu, mu Mifundu, mu Mukandà wà Galàtiyà, bu Mukalenge mwà kwanyisha. Ndi njinga kubala Mufundu kampānda.

14 Mpindyewu, makèèlèlè dilòòlò awu, pāmvwà ntèeleja diyiisha divwà dipātukà kùdì mwanèètù mwambi ewu pa cibùmbà cyà ku cyambilu apa, kwakulayè mu myakulu. Bredesen, Mwanèètù Bredesen, muntu mulenga be. Mèmè. . .

15 Pa kumòna bwalu ebu ne dipanga dyànyì dyà mukandà ne dyà dilonga dyà kàlaasà, dipanga dyànyì dyà dyumvwa dyà myakù, ne pashìishe mumanyè ne Mukenji mmulelèlè, ne mmòna bantu bàà bwena bàvwà ku muyiiki wà ku télévision awu dilòòlò adi, biimāne mwaba awu ne. . .biikāle mwà kukūngamangana ne mùshindù wà beena mamanya a mu mitù abu. Mbafwānyine kwikala kabāyi mwà kwenza cidi Mukalenge mumbiikidile mèmè bwa kwenza to. Mèmè ncyēna mwà kwenza cidi Mukalenge mubābiikidile bōbō bwà kwenza to. Kàdi patùdì tukwàta mudimu pāmwe, ndi mutwìshìibwe ne tudi mwà kufikisha Mukenji, bu twètù ànu mwà kushàala kumpālā kwà Nzambi.

16 Nènku pāfidiyè bu—bujaadiki kaaba aka makèèlèlè dilòòlò awu apu, ne Nyumà Mwîmpè kwakula mu myakulu, ne, muntu kampānda mu batèeleji amu, mèmè ntu misangu yônsò ànu mumanyè mwà kwikala ne kaneemu ku cyôci aci. Bwalu, ndi ngumvwa, ku Bible ne, n’Nyumà wa Nzambi ùtùtwādila cintu kampānda. Ki yēyè kwamba, kwakula bwà mvùlā mushiishe, mvùlambedi ne mvula mushiishe. Ne aci cidi cimfikisha ku meeji kampānda.

17 Mwanèètù Bonham wàwa ùvwa ùfūma ku dimpèèsha kabùki kakesè kiikālemù ne tubèjì twà shekè, kwamba ne: “Ewu mmulāmbù wà dinanga bwà. . . wà kùdì cisāmbà.” Mpindyewu, yēyè—yēyè, kabivwa bikēngela bwà kwikalabò benzè aci to. Nwamōnu’s, ncivwa mulwè kaaba aka bwà kiipācilā aku to. Kàdi mèmè. . . yēyè, bàvwā bawūmpèeshe, nènku, mu bushùwà bwà bwalu, mùvwā mufwānyine kwikala. . . kakwēna mùshindù wà kuwūpingaja to. Nènku nēngwāngātè, bu Mukalenge mwà kwanyisha, nènku nēnditācishè bwà kuwèla mu mfrangā yānyì

yà ditùùla, pândi nya dyàmwàmwà dyà mbû. Bwalu, kabèèna bàntùùdila mfrangà to, nànsha byà munyi, kúnyaayà aku.

¹⁸ Ncyenzè bu munsokòntù, bwalu maèkèleeziyà kaàtu maswè kungaakidila to. Nènkù nényekù bu cilembi, bwalu cidi pambidi pàà Mukalenge wanyì. Mukalenge ngudi mucitèèke pa mwoyi wanyì bwà kucyènza, nènkù bikèngela nyekù mu mùshindù kampàndà wà mudyàlùle. Nwamònu anyi? Pa nànkù bôbò bàdikù ne meeji a pabwàwù ndambù kuntwaku, bwalu muntu yônsò mmuswè ntwe cyâlà pa kartà, bwà mpetangana naabò pa bìdìbo bìitabuuja, ne ngamba ne cisùmbù *cikwàbò* aci ncipiile, ne cisùmbù *cikwàbò* aci cidi cyàmba ne bôbò nèbàngaakidilè bu mèmè mwà kwamba ne cisùmbù *eci* ncipiile. Nwamònu anyi? Kàdi mèmè ncitu munangè abi to. Nwamònu's, tudi . . .

¹⁹ Ntu misangu yônsò ànu nteeta bwà kwimana pankaci pàà bantu, pambèlù pàà malongolodi ne tuumaalu twàbò twà tûtàpululangana atu, ne kubìikidila ku cìvwà cìmwèka bu ne Nyumà wa Nzambì nguvwa wambidila ku bânà bèètù bàà balùme mu dindà emu aci, cyà ne twètù katwèna dīgumba to. Twètù tudi bânà bàà fàmiyè. Mpindyewu, kakwèna dīgumba dyà beena Branham to. Kùdi fàmiyè wa ba-Branham, ne twètù bônsò katwèna tukadilamika ku fàmiyè awu to, tudi balediibwa mu fàmiyè awu. Nènkù ewu, mèmè, cyôci aci ki cindì nteeta kuleeja, ne—ne mwànyi pàànyi mwônsò mùndiku mumanyè amu.

²⁰ Mpindyewu mu Galàtiyà 4.27-31, ngeela meeji ne ndi mwenzè kamanyinu kaaba aka, ndi muswè kubala eci nùnkù bwà cyena-bwalu.

Bwalu bààkafùnda ne: Sàuka, wèwè mukàji nkumba udi kùyi ulela; tùdikà ne mwadi ùdilè, wèwè udi kùyi udìnyènga bwà kulela; bwalu udi mubungàme ùdi ne . . . bânà bààbùngu kutàmba ewu udi ne mulùme.

Mpindyewu twètù, bânà bèètù, bu mwàkadì Izàkà, tudi bânà bàà mulayi.

Kàdi mwàkadìbi musangu awu ne ewu uvwa mulediibwe bilondèshile mubidi uvwa ùkèngesha ewu uvwa mulediibwe bilondèshile Nyumà, ki mùdìbi kàbìdì mpindyewu.

Nànsha nànkù mufùndù wùdi wàmba cinyi? Ipàtà mukàji mupika awu ne mwanèndè wa balùme: bwalu mwànà wa balùme wa mukàji mupika kààkwikala mupyànyi pàmwe ne mwànà wa balùme wa mukàji mudishikàmìne to.

Pa nànkù, bânà bèètù, twètù katwèna bânà bàà mukàji mupika to, kàdi bàà mudishikàmìne.

Mukalenge àsakidilèku mabènesha Èndè mpindyewu ku Dīyī Dyèndè dyà mushinga mukolè.

²¹ Ndi ne ndambù wa, makèèlèlè dilòòlò awu mvwa mufunde tuntu ndambù; ne kale wàwa bìvwa ne, pàmvwà ne disangisha ànu dimwèpelè ku lumingu, mu mwaba kampànda, mvwa—mvwa mwà kuvùluka Mifundu yònsò ayi ànu bimpè menemene ku mwoyi. Kàdi mpindyewu paanyimà pàà mèmè... Mpindyewu, pàndi ngamba mu mùshindù wà mapikù ndambù, kî nnè ndi ne meeji a kwenza bilèlè ku cyambilu eku to. Kàdi paanyimà pàà mèmè mumanè kupita bidimu makùmi àbìdì ne bitaanu, bwà musangu mwibìdì, ncicyèna mvùluka mùmvwà mvùluka kale wàwa amu to. Kùdì byàbúngì... Kùkaadi kilòmèèta búngì cyanààna ku kàshinyi kàà kale kàà Ford aka, nènku ncyèna mbivùluka to. Kàdi bu mùdibì ne ndi mwà kunyungakana, ndi muswè kufila dinyungakana dyònsò ku butùmbì bwà Ewu Wàkansùngila.

²² Mpindyewu mèmè, pàndi dībà adi mmòna mu dindà emu, ntàngila... Pàmwàpa eci cidi cìmwèka cyà pabwàci, ne bwà ngeelèlu wa meeji a mu mutù ncifwànyine kwikala ànu cibwejàkàji menemene, kàdi cidi kààlumbandi ku cintu cindi mèmè mubiikidila. Nànsha kantu kakesè kònsò kàdi ncimanyinu bwànyi mèmè. Ndi nCitàbaleela, mmòna mùyaayaCi. Mushindù awu ki wùntù mpeta diyiiisha dyànyi mîngà misangu, mmu kutàngila ne kumòna mùyaaya Nyumà, ne kumòna mùdì *cikampànda* cyamba, ne *cikansanga* cyamba.

²³ Ne nukàadi bammonèmòne, misangu yàbúngì, kumpàlà kwà mudimu wà dyondopa, ngiimana pa cibumbà cyà ku cyambilu pààpa, anyi nsòmba paanyimà apa, ntàngila. Ndi munkaci mwa kumvwa Nyumà, mùshindù wùdiYe ùkwàta mudimu, nènku mumanè kumanya cidi citàcishà muntu udi musòmba mwaba awu awu. Nwamònu anyi? Mwikale ncimòna, lwà *apa* nùku, nwamònu's, nCibàkula kumpàlà mene kwà kuya pa cibumbà cyà ku cyambilu.

²⁴ Mîngà misangu kumpàlà kwà mèmè kulwa mu disangisha, mîngà misangu, nànsha mene kumpàlà kwà kulwa apa bu ku Californie eku, ntu nsòmba ne bàdì naanyi, ngamba ne: “Nekwènzekè cintu kampànda, *cikampànda* necyènzekè kaaba aka, ne *cikansanga* necyènzekè kaaba aka, neciye mu mùshindù *kampànda*,” nwamònu's, bwalu cidi mmu Nyumà wa Nzambì. Yèyè ngudi... Yèyè ùvwa mumanyè maalu ònsò kacya ku cibangidilu, nwamònu's, nènku Yèyè ngudi Wa Cyendèlèlè awu.

²⁵ Ne pashiishe pa kumòna, mu dindà emu, Mwanèètù Jewel Rose, mulundà ne mwanèètù wa mushinga mukolè menemene kutùdì twètù bònsò, mwàkajuukàye ne kubala Misambu ayi. Tàngilàayi mùvwàbì binwàngàne, mwàkambàye ne: “Ndi muswè kumòna ne ndimiinu dyà mùshindù kaayi didi dikulembèlèlè adi.” Makèèlèlè dilòòlò awu, Nyumà kwakula e kwambaYè pa bìdì bitàngila: “Mvùlà mushiishe, mvùlambedi ne mvùlà mushiishe, yònsò yibìdì miikàle yipòngolodiibwa mu matùkù a ndekeelu.” Nènku mu dindà emu ne: “Dimiinu

didì dikulembèlèlè.” Nwamònu’s, Nyumà wàkula, tàngilàayi mwènzèdìYe ku bambi aba, ne bikwàbò, mu dindà emu. Ki bwà cinyi ndi ngangata cyena-bwalu eci ne: *Dimiinu Kadyàkupyàna Pàmwè Nè Cizubu Nànsha*.

²⁶ Aci’s ncyena-bwalu cyà pabwàci menemene, kàdi: *Dimiinu Kadyàkupyàna Pàmwè Nè Cizubu Nànsha*. Ne ku dyangata, dyòya dyànyì dyà cyòci eci, anyi cyena-bwalu cyànyì’s wè, mu Galàtiyà 4.27, isàtù, Pòlò mwaba ewu mu bushùwà bwà bwalu ùdi wàkula bwà dimiinu dyena diinà dyà bàna bàbidi bàà Abraham abu. Mpindyewu, eci, ndi muswè kukwàta mudimu ne cyòci eci bwà nwikalè batwishìibwe ne kanwèna bacipangile to. Nènku mèmè mupicishe díbà, nèncyàngatè dilòlò edi. Nènku ndi muswè kulongesha, ànu bu dileesòna dyà kàlaasà kàà Dyàlumingu, bwà ne, mündi ngeela meeji, nùpetèku dyumvwa ditàmbe bwìmpè.

²⁷ Nènku mèmè. . . Ne bàmwè bàà kunùdi nwènu bàdi—bàdi batàmbe kwikala bakumbàne mwà kwenza cyòci eci kuntàmbe mèmè abu, mòna’s. . . Mèmè ncyèna mwena tèolòji to, nànsha byà munyì. Ne pa nànkù wèwè mwà kubènga kutwà ku cyànyì pa Cyòci eci, ùdyùmwè ànu mungàdyùmvù makèèlèlè dilòlò pàvwà mwanèètù kampànda wa bakàji munanga mungooshile dyàmpà dyela tumpùlùmànjè. Musòmbe ku cyànyì—cyànyì. . . mu cibambalu cyànyì cyà cilààla-beenyi mu dindà emu, ndi—ndi mutwè dínu pa kaalutete, kàdi ncidi ànu ndyà dyàmpà dyela bimuma. Mèmè kutèka ànu kaalutete aku ku luseke, nudi numòna’s. Pa nànkù, aci cidi, cyùdi kùyì wèwè witabuujà pa Cyòci aci, citèèkè ànu ku luseke, wamònu’s, ne tūngunùkà ànu ne kudyà cyùdi wèwè wela meeji ne ncilelèlè aci.

²⁸ Mpindyewu, Pòlò ùdi wàkula bwà bàna bàà balùmè bàbidi bàà Abraham, bàdi ne, umwe wa kùdìbo ùvwa mulela kùdi Sarah ne mukwàbò ùvwa mulela kùdi Hagàa. Mpindyewu tudi tusangana kaaba aka, ne tudi tuumvwila aci ku Mifùndù ne, kacya Nzambi kàtukù muleejìibwe mu ibidi to. Cìtu mmu isàtù. Misangu yònsò ànu mu isàtù, ki mùtù Nzambi muvwijìibwe mupwàngàne.

²⁹ Makùmi a Bible àdi ènda mu bupwàngàne. Nzambi mmupwàngàne mu isàtù, ùkuukudiibwa mu mwandamutekète, ne bikwàbò. Nwamònu’s, pa nànkù tudi—tudi tusangana ne makùmi a mu Bible kaàtu àpangilakù to.

³⁰ Nènku tudi kaaba aka ne bàna bàà balùmè bàbidi bàà Abraham, kàdi pààbi’s tudi mwà kwikala bapyànyì ànu twètù biikàle umwe wa ku bàna abu, anyi mwàna kampànda wa Abraham. “Bwalu twètù biikàle bafwè mu Kilistò, díbà adi tudi tulwa mamiinu a Abraham, ne tudi bapyànyì pàmwè Nendè bilondèshile mulayi,” ki bwà cinyi Abraham ùdi ne cyà kwikala ne Mwàna mukwàbò wa balume.

³¹ Mpindyewu, tudi bamanyè ne mwanèndè wa balùme wa kumpàlà ùvwa nku Hagàà, ne tudi tusangana ne mwanèndè wa balùme mwibìdi ùvwa nku—ùvwa nku Sarah. Kadi yèyè ùvwa ne Mwànà mwisàtù, ùvwa n'Yesù. Mpindyewu, aci cìdi mwà kumwèka cyà pabwàci, kàdi cyòci aci ki citwikalà mwà kuteeta kusùnsula. Ànu mùngàmbi ne, Nzambi ùdi ùDileeja, misangu yònsò ànu mu bupwàngàne, mu isàtù. Ne ndi mwambè bitòòke tòò kumpàlà kwà bònsò mpindyewu, ne nangànangà kwà beena tèòlòji bèètù ne, bintu ebi bìdi ànu mündi mèmè mbimòna, mùshindù wùdibi bìmvwila awu.

³² Mùvwàbi ku cibangidilu ne, Nzambi, Nzambi ùvwa musòmbè nkàayendè, bwalu Yèyè ùvwa Wa Cyendèlèlè awu, nwamònu's, kàvwa nànsa Nzambi mene to. *Nzambi* “ncintu cyà dikuukwila.” Ne Logos, mutùdi tuCibìikila amu, Dìyì dyàkapàtuka mu Nzambi adi, Aci, muntu kanà yònsò ewu mmumanyè ne Cìvwa m'Mwanjèlò wa Mukalenge, anyi Dìyì dyà Mukalenge, wàkalonda beena Izàlèlèlè mu cipèèlè awu; Mwanjèlò wa Cipungidi awu, Logos wàkapàtuka mu Nzambi awu. Ne pashìshe Logos awu wàkavwijiibwa mubidi ne kusòmbela munkaci mwètù. Mpindyewu tudi mu Yone Munsantu 1 ne: “Ku cibangidilu kwàkadi Dìyì, Dìyì dyàkadi ne Nzambi, ne Dìyì dyàkadi Nzambi.” Nènku mpindyewu, bu mwàkafilàYe mwoyi Wèndè bwètù twètù, dībà adi Nyumà Wèndè ùdi wàlukila pambidi pèètù. Yesù wàkamba ne: “Mu ditùkù adi nenùmanyè ne Mèmè ndi munda mwà Taatù, Taatù munda Mwànyì; Mèmè munda mwènù, ne nwènù munda Mwànyì.”

³³ Nwàmònu's, Cìdi n'Nzambi, dībà dyònsò, Nzambi ùDimwènesha, ùkwàcila Yèyè mwinè mudimu munda mwà bikondo bishìilèshìilàngàne. Nànku bisàtù abi, byà, Taatù, Mwànà, ne Nyumà Mwimpè abi, Nzambi umwèumwè awu ùkwàcila mudimu mu byàmbiibwà bisàtù. Nènku twètù leelù ewu tudi umwe, Èkèleeziyà Yèyè mwinè awu, cyambiibwà cyà meeji a Nzambi kumpàlà kwà difùkà dyà dyulu ne buloba, bwà kwikala ne—ne Èkèleeziyà. Pa nànku aba bàdi mu Kilistò bàvwa munda mwà Kilistò ku cibangidilu, cìvwa mmeeji Èndè, ne meeji Èndè mbyambiibwà Byèndè.

³⁴ Apa dimiinu dìdi dibanga, mu mayi. Kàdi apa Abraham wàkeela mpatà kakesè, ku Ishàmèlè. Nènku ndi muswè kunùleeja bitùpà bisàtù byà byòbi ebi, byà Dimiinu ditwikalà mwà kwakulapù edi, dìdi kadiyi mupyànyi pàmwe ne cizubu edi. Mpindyewu tudi tusangana ne, ku cibangidilu eku, Nzambi wàkapèèsha Abraham mayi.

³⁵ Yèyè wàkapèèsha Adàmà mayi, dyàmbedi. Kàdi aci cìvwa, anyi, cipungidi cìvwa nku mishingà. “Wèwè kùyi mwenzè *cikampànda*. Wèwè mwenzè *Cikansanga*.”

³⁶ Kadi pààkacipèèshàYe Abraham, kacìvwa cyà mushingà mwenza to: “Mèmè nkàadi mumanè kucyènga.” Kacya Yèyè...

CyàkenzàYe aci, kacivwa cyà mushingà mwenza to, Yèyè ngwàkapèesha Abraham. Mpindyewu, ne ku cyòci aci, Abraham mwikàle ne mulayi awu, ki bwà cinyi bikèngela twikalè Dimiinu dyà Abraham. “Kacivwa ànu kùdi Abraham to, kàdi kùdi Dimiinu dyèndè paanyimà pèndè.” Mpindyewu bu nwènù mwà kumòna, kacivwa “mamiinu” paanyimà pèndè to, kàdi “Dimiinu” paanyimà pèndè.

³⁷ Mpindyewu tudi tusangana ne mulayi awu, bu mwàkeediibwàwu mpatà kakesè kùdi Sarah, ne Sarah kwambilayè Abraham bwà kwangatayè Hagàà ewu, mwena Èjiipitù ewu, nsongàakàji ewu, bu mukàjèndè, ne mùshindù awu mufwànyine kwikala mûvwà Nzambi mufwànyine kajuula dimiinu dilaya edi.

³⁸ Mpindyewu nudi numòna’s, ditentemuka, bu mûngămbi makèlèlè dilòlò awu, ditentemuka kanà dyònsò ku ndongamu wa ku cibangidilu wa Nzambi awu didi dikùpa cintu cyònsò mu kaabujimà mu cincyòmpanyòmpa. Katwèna mwà kutentemuka kuumuka ku Dîyi dyà ku cibangidilu adi nànsha. Bidi bikèngela. . . Tuvwa baakùlepù makèlèlè dilòlò, anyi dilòlò dyà dyàbwàbwa’s wè, pa Baalàmà. Yèyè wàkapeta dyandamuna dyà Nzambi, dyà buludì ne ditòoke tòò ne: “Kùyì nànsha!” Kàdi Yèyè ùtu ne diswà dyà cimfùläämwòyi. Nènku wèwè udi mwà kukwàcila mudimu mu dyòdi adi pawikalà muswè, ne Nzambi neàcifikishè ku diMupà lumù, kàdi kaciyi ànu diswa dipwàngànè dyà Nzambi to. Nènku aci ki cìvwà cìkèngela twètù kudyènzejila, ndiswa Dyèndè dipwàngànè adi, kaciyi diswa Dyèndè dyà cimfùläämwòyi to. Bukalenge bwà Nzambi, bùdiYe. . . bùdi pa buloba leelù ewu ebu, nebwikalè. . . kabwènakù mwà kushikikiibwa, mu mùshindù mujaalàme, pa diswa dyà cimfùläämwòyi to. Bidi bikèngela byàlukilè ku diswa Dyèndè dipwàngànè.

³⁹ Mpindyewu tudi tumòna apa ne Sarah, paanyimà pàà Nzambi mumanè kwambila Abraham ne mwànà awu ùvwà mwà kulediibwa kùdi Sarah, uvwa mwà kubènesha bàà pa buloba awu, mpindyewu Sarah kucyèlayè yèyè mpatà. Ndi muswe bwà nùmonè ne, kacyakafùminakù kùdi Abraham to; kàdi nkùdi Sarah, mukàji awu. Ki kucyèlayè mpatà, kwambayè ne: “Angàtà Hagàà.” Kàdi Abraham kàvwa muswè kwenza aci to, kàdi Nzambi ngwàkamwambila bwà àye kumpàla àcyènzè mwinè. Ki kucyènzayè, mwelè mpatà kakesè. Mpindyewu, Izàkà, mwikàle mudishikàmìne ne wa kùdi mukàji mulaya awu, kàvwakù mwà kwikala mupyànyi pàmwe ne Ishàmèlè, wa mukàji mupika, mu mpatà to.

⁴⁰ Ki cìvwà Pòlò ùteeta bwà kwamba apa. Nwamònu’s, mwaba wùdi cintu cimwèpelè cyediibwe mpatà, ne cìtwala cintu kampàndà cyà Nzambi, bulongàme kampàndà bwà Nzambi, kàdi kacyakupyàna pàmwe ne ndongamu wa ku cibangidilu wa

Nzambì nànsa. Nudi bumvwè anyì? Nwamònu's, kacyèna mwà kupyànakù to.

⁴¹ Mpindyewu ki bwà cinyì mèmè ne dikàndà dyònsò leelù ewu. Nènku mvwa ndyàmbidila ne eci ncifwànyine kwikala cikondo cimpè, bwalu ncyèna mumanyè ne netwikalè pàmwè too ne dībà kaayi to, nènku, pàmwàpa ndi mufwànyinekù, mùshindù kampàndà wùdì Nzambì mufwànyinekù kunkwàcisha bwà nnùleejè bwà cinyì ndi ntàmba kudyula ntèndeleelelu mudìlongolwela. Nwamònu anyì? Nwamònu's, kacyèna mwà kupyàna pàmwè ne ndongamu wa ku cibangidilu wa Nzambì to, bwalu bulongolodi kī mbwà kùdì Nzambì to. Mbwà kùdì bantu. Èkèleeziyà wa kumpàla wàkadyènzakù bulongolodi, pa buloba bujimà, ùvwa ng'èkèleeziyà wa Kàtòlikè wa cyena-Loomò ku Nicée, Loomò. Bwàkabuulwibwà 17, mmwambè ne: "Yèyè ùvwa mukàji wa masandi, ne bānà bèndè bōnsò bàvwa bandumbà." Ne mukàji wa masandi mmukàji ùdì kàyi ne nsòmbelu wa lulamatu kùdì bàyendè to, ne ndumbà ncintu cìmwècìmwè aci. Kàdi, nudi numòna's, wàkalwa èkèleeziyà, nànsa nànkù. Ndongolwelu mudìlongolwela ne mwikàle útàpulula bwànà bwètù. Tudi bateetè kuvwija èkèleeziyà yònsò bulongolodi bùmwe. Kabyàkukùmbanakù to; kabyàkakùmbanakù to. Kabyàdyàkukùmbanakù to. Nsangilu wa Maèkèleeziyà wa Buloba bujimà awu, bàdi ànu... bàdi pambèlù pàà ndongamu wa Nzambì.

⁴² Mpindyewu wèwè udi wamba ne: "Wèwè udi nganyì's, muntu mwimàne mwaba awu kàyi nànsa ne dilonga dyà kàlaasà kàà cilongelu cipwekèle eci ewu?" Aci kacyèna ne cìdici cishintulula to, dilonga dyà tūlaasà adi. Dilonga dyànyi dyà kàlaasà kī ndìndi nteeta kwamba to.

⁴³ Dìyì dyà Nzambì ndìndi ngamba, nwamònu's. Ne bishindiki byònsò binùdì numòna mu mudimu wà bwambi ebi, kī mmèmè to, Nzambì ngudi uteeta bwà kunùfikisha eci kunùdì ne, m'Bulelèlè. Nzambì mmufwànyine kwikala ne cyà dyenza ne mashimi anyì? Dībà adi kabìngenzediku nànkù to mèmè ewu, nkwàcila Nzambì mudimu udi mufwànyine kubènesha mashimi. Bulelèlè mbùdìYe ùbènesha, Bulelèlè mbùdìYe mutwè mushinga.

⁴⁴ Mpindyewu, Ishàmèla kàvwakù mwà kupyàna pàmwè ne Izàkà nànsa, bwalu umwe ùvwa mwelela mpatà kakesè, mwelela mpatà ànu kakesè cyanààna. Ùvwa mwànà, ùvwa ànu dimiinu dyà Abraham's, kàdi kacìyi mùshindù mupwàngàne wà Nzambì bwàcì to: Ishàmèla awu. Mpindyewu ndi mufwànyine kupicisha dībà dyàbùngì mwaba ewu, kàdi ndi ntèkemena ne Nyumà Mwimpè neànùfikishilè eci mu mùshindù mulelèlè wudibi bìkèngela kwikalacì.

⁴⁵ Mpindyewu pìikalàbò, pìikalàbi ne Ishàmèla ne Izàkà kabàvwa mwà kupyàna pàmwè bwalu ndongamu wa ku

cibangidilu wa Nzambi wàkatèèkiibwa ku luseke ne kwangata ndongamu wa—wa cimfulààmwòyì wa Nzambi, mùshindù wà cimfulààmwòyì wàkabèneshà Nzambi awu, nànsha Èkèleeziyà wa nyumà leelù ewu kèna mwà kwikala mupyànyì pàmwè ne dīgumba to. Beena mǎngumba abu, Nzambi mmubàbèneshè, mwàkabèneshàYe Ishàmèlà, kàdi wa Nyumà kààkwikalakù mupyànyì pàmwè ne bakwàbò abu nànsha. Ncyà bushùwà. Nekwikalè, nekùpatukilè mu dīgumba dyà èkèleeziyà (èkèleeziyà wa ku dīnà, èkèleeziyà wa mu mubidi), nekùlwe Mukàjì-musèla wa Kilistò, Basungula abu.

⁴⁶ Mpindyewu mwaba awu, cìdì cìntàcishà mèmè mu dībà edi, ncyà kumanya ne tudì tumòna mǎngumba ònsò aa àdikòkela mu citùdì bamanyè ne ki . . cinùdì nubiikila ne mmvùlà mushiishe, anyì, diicikija dyà Nyumà aci. Nudikù bamanyè ne Yesù wàkamba, ne: “Pènzekà aci, neciikalè ndekeelu” anyì? Pààbi, virgò mukùtākāne ne virgò wa lungènyì awu kabàvwa bapyànyì pàmwè to. Bwalu pàdì . . Virgò mukùtākāne awu, s’ùvwa virgò, mupangile ànu Maanyì cyanààna. Kàdi pààkalwàye bwà kusumba Maanyì, pàvwa mpa dyòdì dībà adi pààkalwà Mubàki. Nènku yèyè awu wàkashiyyiibwa pambèlu, pàcìvwàye ùteeta bwà kusumba Maanyì apu. Nuumvù anyì? Ndi muswè aci cibwelè, bimpè menemene. Mpindyewu, ncyà bushùwà ne kabyàkukèngela bwà mèmè kuya ne cyena-bwalu aci kule to. Mpindyewu, nànsha wa Nyumà ne wa mubidi kabààkwikalakù bapyànyì pàmwè to.

⁴⁷ Ki bwà cinyì Dyambwibwa, Mukàjì-musèla, virgò wa lungènyì awu, mubiikila bwà kupàtuka, mudyànjila kulongolola, musungula awu! Mòna’s, nwènu beena kantu-ku-byanza kanùvwa bafwànyine kulombola bìrò byènu mùdì bàmwè bantu bàteeta kudyèlela meeji ne Nzambi ùdì ùlombola ndongamu Wendè amu to, ku mpùùkàpùùkà. Nzambi ùvwa mumanyè, kumpàlà kwà difùkà dyà dyulu ne buloba ne, nganyì uvwa mwà kusungidiibwa ne nganyì wabènga kusungidiibwa. Ku didyànjila-kulongolola, ku didyànjila-kumanya, Yèyè wàkamòna cidimba cyònsò, kufùnda dīnà dyònsò mu Mukàndà wà Mwoyi wà Mwàna wa mùkòòkò, kumpàlà mene kwà Èkèleeziyà kubangayè. Yesù wàkalwa bwà kukeba ne kusungila bàvwa mu Mukànda awu abu. Yèyè wàkasumba Mukàndà wà Bupikudi. Wùvwa mujimine, kàdi Yèyè kutùpikula, ne mènà ònsò àvwà mu Mukàndà awu àkapikudiibwa pààkatùpikulàYe apu.

⁴⁸ Nènku, ànu mùntù misangu yàbùngì mwambàmbè amu, wèwè udi uringulula aci. Ki bwà cinyì nudi kaaba aka mu dīndà emu, bwà cinyì nudi nupàtuka mu malongolodi ònsò aa ne bikwàbò. Wèwè udi . . Kùdì Cintu kampàndà cìkukòka. Ànu mùvwà kaadyeji kàànyì kakesè aku, kàà mukankù mutooyishila mwinshi mwà nzòòlo wa cikuka, nwamònu’s, udi—udi ufika ku dyumvwa ne kùdì cintu kampànda cishiilàngàne. Èkèleeziyà

kàwva ne—ne cintu cyà cisànkisha to. Kàdi, wèwè, wàkumvwa cintu kampànda cikwàbò civwà lubilà lukolè, wèwè kumanya ne, mbwà Cyòci aci bûvwà mulediibwe. Wèwè udi citùpà cyà ku Cyòci. Wèwè, udi ukùmbanganaMù, ànu mùdì gant ku cianza amu. Ki bwà cinyi tudi badisangishe kaaba aka mu dindà emu, mbwalu, ànu mùvwà mààmù wanyi mukùlakàji wa ku sud ne ciibidilu cyà kwambà amu ne, “nyuunyi yà masàlà mafwànàngàne yìtu yàdisanga,” mbwalu nudi ne bintu byà mwomùmwe.

⁴⁹ Tubangu-nyuunyi ne nkuci kabyèna ne bintu byà mwomùmwe to. Ndiilu wabi mmushilàngàne, nansna mùdì nkuci mwà kutooyishiibwa mwinshì mwà kabangu-nyuunyi. Ncya bushùwà. Mbilondeshile civwaci, ànu kwinè kwònsò aku. Mpindyewu, ne mu cyòci aci, nansna nanku, nku—nkuci mmufwànyine kwikala mubèèja bwà cikondo kampànda, kùdì kabangu-nyuunyi, kàdi ndekeelu wa byònsò yèyè neàpetè nyàanendè.

⁵⁰ Ki cidi Èkèleeziyà munkaci mwà kwenza leelù ewu, bwalu Yesù ùdi Dìyi ne Yèyè ùdi Mubàki, ne Mukàji—musèla ùdi citùpà cyà ku Mubàki. Ki bwà cinyi Dìyi didi ne cyà kuujiibwa mu ditùkù edi didi citùpà cimwècimwè cyà Dìyi dyàkuujiibwà mu ditùkù Dyèndè adi, ne n'Dìyi dimwèdimwè adi, dilabula dimwèdimwè adi, Mwoyi wùmwe wùmwe awu.

⁵¹ Bwalu, pàakatàpululà Nzambi Adàmà, yèyè ùvwa byònsò bibidi. Tudi tusangana ne, Adàmà ùvwa nyumà, kumpàla. “Wàkenza muntu mu cimfwànyi Cyèndè Yèyè mwinè, Wàkafùka mulùme ne mukàji.” Ki pashiishe, kubangila mu Genèsè 2, Yèyè wàkafùka muntu mu... ku lupwishi lwà buloba. Muntu wàkafùkiibwa mu cimfwànyi cyà Nzambi (Nzambi ùdi Nyumà), pa nanku yèyè mmuntu-nyumà. Pashiishe pàakalwàye muntu wa mubidi, mubidi wà nyama pa buloba, Yèyè ùdi—Yèyè ùdi ùleeja, ùleeja mu cimfwànyi Mukàji—musèla pànwapa. Yèyè kààkangatakù e kwenza muntu mukwàbò to, kàdi Wàkangata citùpà cyà Adàmà, bufùki bwà ku cibangidilu, mwangàta ku yèyè, lubadi lwà mu luseke lwèndè; ne kupàtula nyumà wa bukàji mu Adàmà, kushiyamù nyumà wa bulùme, ne kumutèeka mu citùpà cyà bukàji. Ki bwà cinyi, citùpà cyà nyumà wèndè, citùpà cyà mubidi wèndè; musunya wa ku musunya wèndè, mufubà wà ku mifubà yèndè; Dìyi dyà ku Dìyi Dyèndè, Mwoyi wa ku Mwoyi Wèndè, ne mùshindù awu ki wùdì Mukàji—musèla kùdì Kilistò!

⁵² Ki bwà cinyi bìdi bikèngela bwà Dyambwibwa dyà Dimiinu dyà Bukalenge dyànji kulwa dyàmbedi. Ne bafwè bakwàbò kabààkiikala ne mwoyi to munda mwà bidimu cinunu, pashiishe bàakalwa naabò ku Cilumbulwidi cyà Nkwasa Mutòoke. Nwamònu's, kakwèna Dilumbulwisha bwà Dimiinu dyà Bukalenge to, anyi Dimiinu didyànjila kulongolola dyà Abraham. Mpindyewu nwènu bangàte Yone Munsantu 5.24,

tèelejààyi eci nùnkù: “Ewu udi umvwa Dìyì Dyànyì, ne witabuuja Ewu udi muNtùme, ùdi ne Mwoyi wà kashidi.”

⁵³ Mpindyewu aci ncifwànyine kwikala cishìllàngàne bikolè ne yàbùngì yà ku tèlòlòjì yètù eyi’s? Mpindyewu ndi mufwànyine kupàtuka apa kwambila mukwàciki kampànda wa maalà ne: “Udi witabuuja anyi?” “Cyà bushùwà’s!” Mulùme mwikàle ne mukaj’a bendè ne: “Udi witabuuja anyi?” “Cyà bushùwà’s!” “Ùvwa musòmbe mu disangisha makèlèlèlè dilòdòlò, bwà kutèeleja Dìyì anyi?” “Bushùwà’s!” “Udi muDìtàbùùje anyi?” “Bushùwà’s!” Yèyè’s ùdi wàmba pèndè ànu bwà kwamba.

⁵⁴ Kàdi dyumvwija dyà ku cibangidilu dyà Dìyì edi: “Ewu udi *umvwa* Dìyì Dyànyì, ne witabuuja Ewu udi muNtùme.” “Ewu udi umvwa,” mbwena kwamba ne, udiDì dimanyishiibwe kùdiye awu.

⁵⁵ Yesù wàkamba ne: “Muntu nànsha umwe kèna mwà kulwa kùNdì pàdi Taatù Wanyì kàyi mumukòke to. Ne bônso bàdi Taatù Wanyì muMpèeshe, nebàlwe. Mikòòkò Yànyì, nkuci Yànyì, yidi yitèeleja Dìyì Dyànyì. Kayààkulondakù mwenyi to.” Nènku Dìyì dyà mukana dyà Nzambi ncinyi? N’Dìyì dyà Nzambi. Dìyì dyà mukana dyà muntu kanà yônso ewu ncinyi pìikalàci kaciyi dìyì dyèndè? N’Dìyì dyà Nzambi; bóbò nebàteeleje Dìyì dyà Nzambi.

⁵⁶ Nènku dimiinu dyà mubidi òvwa ànu cyambudi cyanààna, ku Ishàmèlè dyàmbedi, Izàkà diibìdì, pashìshe too ne ku Dimiinu adi. Ànu mùdì cìkolakola, mwepu, ne cizubu, cyà blé. Mpindyewu, apa, bitùpà bisàtù byà dimiinu ebi bìdì bitùleeja cimfwànyì cilelèlè cìndì muswè bwà nwènù kumòna pàmwè naanyì mu dindà emu. Tudi munkaci mwà kumòna mwab’ewu.

⁵⁷ Nènku bu mùndì ncìyi ne kàlaasà kalonga to, bikèngela ngàngatè bintu byà mubidi bìndì mmòna, bwà kufwànyikija ne bintu byà nyumà bìdì bimanyishiibwe kùndì, bwalu ncyèna mufwànyine kunùvwijilaci cyà meeji mu dilonga dyà mwakulu kanà dyônso to.

⁵⁸ Nènku, nànsha nànkù, Nzambi ùtu misangu yônso ànu ùfwànyikijila byà nyumà ku byà mubidi. Bu ne kakùvwakù Bible to, mvwà ànu mmanya ne bwena Kilistò mbwà cyà bushùwà, bwalu buloba bujimà bùdì bùnyùngulukila pa lufù, dijiikiibwa, ne dibìikà dyà ku lufù. Bufùki bùdì bùkwàta mudimu ne lufù, dijiikiibwa, ne dibìikà dyà ku lufù.

⁵⁹ Tàngilààyi mâyì a mu mucì, mùdìwu matwàle dibèjì, ne cimuma, bìmata; àbwela mu buloba bwà movù wà mashika, mwìnshì menemene mwà bulààlù bwà buloba; àbànda cyàkàbìdì mu movù wà bintu bitòloka, ne mwoyi mupyamùpyà. Ku cidimu cyônso, bifila bujaadiki ne kùdi mwoyi, kùdi lufù, kùdi dibìikà dyà ku lufù.

⁶⁰ Dìbà didi dijuuka mu dindà, mwànà mukesè wa mu dibòko wa ùfuma ku dilediibwa, wa butekètè bwà menemene. Pa dìbà mwandamutekètè anyi mwandamukùlù, ùbanga kuya mu

kàlaasà. Pa dîbà dikùmi anyi dikùmi ne ùmwè, ùpàtuka mu cilogelu citùmbùke. Didi dîkenka mu dikàndà dyàdì, kuumukila lwà pa dîbà dikùmi ne ùmwè too ne lwà pa dîbà isàtù, pashìishe dîbanga kuteketa. Mu dilòòlò didi dîpweka, diteketa, muntu mukùlàkàjì. Ki ndekeelu wadi, dyáfù anyi? To. Didi dîjuuka cyàkàbìdì mu dindà dyà pàdibu bûcya. Nwamònu anyi?

⁶¹ Bufùki bwònsò, Bible webè mulelèlè ùdi ùjaadika pàmwè ne ewu Bible! Nènku cyòci aci ki cîndi nteeta kunùleeja mu dindà emu mpindyewu, ku bufùki nenùmonè Dîyi dyà Nzambì, bùkùmbanangana ne Dîyi dyà—dyà Nzambì, bwalu bufùki ncintu cyenza kùdì Nzambì.

⁶² Bu mùdì maalù a mamanya, bàdì bàsangana byàmu bilamakaja ne mikenji yà bufùki, kàdì kabàyi bamanyè ne bufùki abu ncinyi to. Ki mbamanyè Mwoyi wà bufùki to. Ki Nzambì nyawù. Pa nànkù, byamù bilamakaja kakùyi bukolè bwendeshi to kabyènakù ne dikwàcisha to.

⁶³ Mpindyewu, cìkolakola, mwepu, ne cizubu, mònaayi. Hagàà mwab'ewu ùvwa ùleeja cìkolakola, cìvwà ciikàle mwoyi wà kumpàlà wàkabangà mu mulayi. Sarah ùdi ùleeja mwepu, anyi bungungu bwa bilongò, bùbwela mu mwepu. Màriyà, virgò awu, ùvwa uleeja ne mupàtùle Dimiinu dilelèlè dyà nyumà, bwà kupàtula cìkolakola cilelèlè aci. Hagàà ne Sarah, bònsò bàbìdì bàvwà nku disangila dyà mulùme ne mukàjì. Kàdì Màriyà, virgò awu, kùvwà nku bukolè bwà Dîyi dilaya dyà Nzambì, nku dilediibwa dyà kùdì virgò. Yèyè ngwàkatwàla Dimiinu dilelèlè. Cìkolakola, Hagàà awu, mukàjì mwibìdì, ku dyela dyà mpatà ku mulayi, bikwàcila mudimu ku mpatà, kakesè.

⁶⁴ Ndi ànu ntèkemena ne, Nzambì àtùkwàcishèku. Ncyèna . . . Ndi muswè bwà nùmonè eci eci, njinga ne mwoyi mujimà. Kwèna mwà kuCyèla mpatà to nànsa mikesè. Bikèngela ùCyàngàtè ànu mùdìCi amu. Kacyèna cìkèngela dyumvwija nànsa. Bible ùdi wàmba ne: “Dîyi dyà Nzambì kî ndyà didyùmvwijila dyà muntu pàà nkàâyèndè to.” Nzambì kàtu dijinga ne nànsa cìmwè cyà ku bilongelu byètù bwà kuumvwija Dîyi Dyèndè to. PàdìYe ùDishindika ne ùDìvwija ne mwoyi, ki dyumvwija dyàDì ndyòdì adi. Pààkambà Nzambì ne: “Bukènkè bwikalèku,” bukènkè bwàkiikalakù. Aci kacyèna cìkèngela bwà kuumvwijiibwaci to. PààkambàYe ne: “Nsongààkàjì virgò neimitè difu,” s'wàkiimita. Kabyèna bikèngela kuumvwijiibwaci to.

⁶⁵ Katwèna dijinga ne byònsò ebi to, maasèminèrè ne bikwàbò mbìdì bibàkulà bantu abi ne: “Èè, *twètù* mbàdì ne dyumvwija. *Twètù* mbàdì ne dyumvwija.”

⁶⁶ Nzambì Yèyè mwinè ngudi umvwija Dîyi Dyèndè Sungasunga. Kàtu dijinga ne muntu bwà kuMuumvwijilayè to. Yèyè wàkamba ne: “Necyènzèkè,” s'ki kwenzekaci eku. Wàkamba ne mu matùkù a ndekeelu Yèyè ùvwa mwà kwicikija Nyumà Wendè, mMucyènzè. Cìdì màngumba mambè nànsa

ciikàle cinyì, Yèyè mmucyènzè, nànsha bìshi, bwalu Wàkamba ne neÀcyènzè. Pa nànkù, kaCyèna cikèngela dyumvwija to, bwalu Nzambì ùdì wènza dyumvwija Dyèndè Sungasunga.

⁶⁷ Nènku bintu binùdì numòna, bìdì bimwèka bu bìdì kabìyì byùmvwika mpindyewu kunùdì ebi, bu nwènù mwà. . . Vùlukààyi mudimu wènù wà bwambi, nwènù beena Mpenta, bàà kùkaadi bidimu makùmi àsàtù anyì makùmi ànaayi, s'wùvwa kùdì—kùdì èkèleeziyà wa ba-Méthodistes ne ba-Baptistes ànu bwalu busokoka bwà dikèma, mùdì Ewu nùnkù kunùdì nwènù leelù ewu emu. Kàdì mpindyewu Wùsangànaayi mu Dìyì's. Mèmè's ndi nteeta bwà kunùleeja ànu munùvwà nwènù nuteeta bwà kubàleeja bóbò amu. Ne pashìishe pìikalà Nzambì ùkùdimuka wàmba ne Cìdì nànkù, mu Dìyì, pashìishe ùshindika ne ki mùdìCi, adi's ki dyumvwija dyà Nzambì Sungasunga. Kabyèna bikèngela bwà muntu kunùumvwijayè to.

⁶⁸ Mpindyewu, Hagàà, ku “kakesè”! Vùlukààyi ne, kwèna mwà kuumushilaKu Dìyì nànsha dimwè to. Ne Yesù ngwákamba, mu Bwàkabuulwibwà, ku ndekeelu kwà Mukàndà. Ne ku ntwàdijilu kwà Mukàndà, Kilistò mmwambè ne: “Muntu yònsò wadidìnga kuumushila Kantu kàmwè ku Dìyì adi awu!” Ànu Dìyì dimwèpelè cyanààna dyumvwija bibì, dyàkakèbà disaamà dyònsò, lufù, lutùkaadiku bapetè elu. Èè, pìikalàbì ne Nzambì, Yèyè udi wa cijila awu, wàkatàngila panshi; ne kukèba cimvundù cinène cyònsò eci ànu bwà dyumvwija bibì kakesè dyà Dìyì dimwèpelè, nènku kantu kakesè kanà kònsò kàà kàbèngangana ne Dìyì dyà ditàmbe kutùmbuka adi ki kààkakèbà cimvundù cinène cyònsò eci; ne kusaama, kuzònta mashi ne lufù lwà Mwan'Èndè Sungasunga awu, bwà kupungisha kùdìYe cintu cyà cikwàcisha bwòwà eci; mmunyi mutwikalà mwà kubwelela mu cintu kampànda cishààdile ku dilama dyà Dìyì mu kaabujimà?

⁶⁹ “Èè,” mùdì wamba, “Mwanèètù Branham, aci's cìvwa mmu Genèsè.” Ngùmvù cyòcì aci, nwamònu's.

⁷⁰ Kàdì imàna nkwambilè, Bwàkabuulwibwà, ki citùpà cyà ndekeelu cyà Mukàndà. “Ewu yònsò wadidìnga kuumushila Dìyì dimwè ku Mukàndà wà cipròfetà ewu, anyì kusàkidilaKù dìyì dimwè, cyèndè citùpà necyùmushiibwè ku Mukàndà wà Mwoyi.”

⁷¹ Yesù wákamba, munkacì mwà Mukàndà! S'ki bantèmu bèènù bàsàtù mbóbò abu: Genèsè, Dipungila Dipyadiyà, ne ditùkù dyà leelù ewu edi. Yesù wákamba ne: “Muntu kààkwikala ne mwoyi ànu ku dyàmpà nkààyaadi to, kàdì ku Dìyì dyònsò didì dipàtukà mukana mwà Nzambì.”

“Èè, kì ncìvwàYe muswè kwamba to.”

⁷² Ùvwa wàkula ne bantu bàvwà beena tèlòlòjì, bàà batàmbe kutùmbuka abu. Baakwidi abu, baledi bàà baakakwábò bàà baakakwábò bàà baakakwábò bàvwa ne cyà kwikala baakwidi. Bwà kuumvwija bibì Dìyì dyàCì dimwèpelè, mòna's, kakuyi mpatà to's cìvwa ncìbawu cyà lufù. Bivwa bikèngela

bàashii bwè mabwe, bwà Dîyî dimwèpelè dipangike. Kàdi bàvwa ne dyumvwija dyàCì dibi. Ki bwà cinyi Dîyî Dyôdi diinè; pàvwà Nzambi mulayè bwà kutùma Maasiyà, ne kuCìtùmaYè mu mikùsù mene mwàkalayàYe ne mmùvwàCì mwà kulwila apu, bàvwa bôbô ne mikùsù mishiilàngàne bwà kwikalaCì ciswikilamù.

⁷³ Lekèlaayi ngàmbè nùnkù: Ki mùdìbi kàbìdì leelù ewu ne, kabèèna bàCyùmvwà to! KaCyèna mu mikùsù yà cyenamàngumba yà mamanya a mu mitù nànsa. Cìdi mu mukùsù wà bukolè ne dibìikà dyà ku lufù, ne dimwèneshiibwa dyà Kilstò mubiike ku lufù, mùshindù wùdi Nzambi muCìlayè, ne kabìyi mu mukùsù wà meeji àdi naawù bantu bwàCì to.

⁷⁴ Mpindyewu, Hagàà, ku kaadishii langana kakesè kàmwèpelè, ku mukàji, kàdi kakùyi ku Abraham to. Abraham yèyè kàvwa muswè kucyènzà to, kàdi n'Nzambi wàkamulekela ùcyènzà bwalu yèyè. . . Ncintu cìmwècìmwè aci, Wàkalekela Baalàmà ùtùngunuka. Mpindyewu mònayì, ku dishii langana kakesè naaCì, kulelayè Ishàmèlà, uvwa muntu mutombòke awu, kacya kàyikù mwanji kucimuna to. Ùvwa ne mwoyi ku butà bwèndè bwà mikete. Ùvwa muntu mutombòke. Ki cìcìdiye, leelù ewu.

⁷⁵ Mpindyewu Sarah, mwepu, anyi bungungu, Sarah, mukàji mulelèlà wa mulayì, ùdi ùlela mulùmè wa kalolo, pa nànkù's wàkapàtula ditùnga dilaya.

⁷⁶ Mpindyewu, kàdi, Màriyà, kakùyi disangila dyà mulùme ne mukàji to, kàdi ku mulayì, ànu mwàkapetà Abraham mulayì wà kùdi Nzambi amu, Dîyî dyà Nzambi, kàdi mwiitabùùje mulayì ne: “Musadidi wa Mukalenge nyèyè ewu,” nwamònu's, kàyi mupàtùle cìkolakola to, kàdi Dimiinu dyà ku cibangidilu adi, bwalu Yèyè ùvwa Dîyî òvwà Abraham mwiitabùùje ne òvwà Màriyà mwiitabùùje adi.

⁷⁷ Mpindyewu, kì m'Màriyà uvwa Dimiinu adi to, yèyè ùvwa ànu cizubu bwà Dimiinu. Bakwàbò bàbìdì abu bàvwa byambudi byà mwoyi, ànu dimiinu dyà mubidi cyanààna. Màriyà kàvwa Dimiinu adi to, yèyè mwinè; kàdi mùdi diitabuujà mu Dîyî dyà Nzambi amu, mutwàle cimfwànyì cilelèlà cyà Dîyî, bwalu Mwànà kì ùvwa Dîyî. Kàdi ànu mùdi cizubu, cyà. . . cyà blé, ditètè dyà blé, cizubu ncilamè blé munda mwàci ne cimukùba too ne pààkùmbanàye anyi pààbobàye bwà kuditùngunukilayè yèyè nkàayèndè. Nwamònu anyi? Dìbà adi, Dimiinu Dyôdi diinè ndyàkapàtukà munda mwèndè. Ànu mùdìbi ne, Dimiinu adi òvwà munda mwèndè, yèyè kì nguvwa Dimiinu adi to. Yèyè kì ngwàkapàtula Dimiinu adi to. Nzambi ngudi Dimiinu adi.

⁷⁸ Mpindyewu, mashi dìbà adi, bantu bààbùngì bàtu bèèla meeji ne nku mashi a mwena Yudà kutwàkasùngidiibwà. Ne bàmwè bàà kùdìbo mbambè ne: “Èè, tudi bapetèle bukenji kùdi bàà Bisàmbà byà bendè, bwalu Laahàbà ndumbà awu ne—ne Luutà mwena Moàbà, ne bikwàbò, bàvwa bàà Bisàmbà

byà bendè.” Kanwènakù ne bukenji bwà kunana aci to nànsha kakesè, nànsha bùmwe. Yèyè kàvwakù ní mmwena Yudà ní ngwa bàà Bisàmbà byà bendè to.

⁷⁹ Yèyè ùvwa Nzambi, Logos awu, Dîyì dyàkapàtukà mu Nzambi adi. Dìbà adi, Wàkabanga kulààdila buloba, ki kupàtulaYè mwoyi wà mu mbù. Pàvwà Nyumà wa Nzambi, Logos awu, Dîyì, dyàkambà Nzambi adi ne: “Kwikalè,” ki Logos kupàtukaYè, udi Dîyì awu. Ki Dîyì kubangaDì. . . bwalu byònsò ebi bìvwa mu Logos; Dîyì dyà Nzambi dijimà, Bible mujimà, bwà cikondo ne cikondo cyònsò. Nènku pààkabangà Logos kwela lupeepèlè pa buloba, ki kulwakù mwoyi wà mu mbù; ne mu kwenda kubànda, mwoyi wà bukwànyuunyì, kubànda too ne mu mwoyi wà bukwànyama. Ki ndekeelu wa byònsò kulwakù cintu kampànda mu cifwànyikijilu, anyì cifwàngàngàne ne cintu cìvwa cìcìlongolola bwà kupàtukaci, cìcìlàadila, Nzambi, muntu mu cìmfwànyì mene cyà Nzambi.

⁸⁰ Muntu awu kudishìndayè, ànu mùdì dimiinu ne cyà kumata amu. Ki pashìishe Nzambi kubangaYè kucilàadila, paanyimà pàà cibulà. Yèyè kujuula He—Henòkà, Yèyè kujuula Eliyà, Yèyè kujuula Mòsà, Yèyè kujuula ku mupròfetà ku mupròfetà, ùteeta bwà kwalujulula cìmfwànyì aci. Nènku, ndekeelu wa byònsò, pa buloba kulwakù cìmfwànyì cilelèlè cyà Nzambi Yèyè mwìnè cyàkàbìdì, uvwa Nzambi awu, Logos muvwijìbwe mubidi ne kusòmbela munkaci mwètù.

⁸¹ Mpindyewu Logos umwèumwè awu ùdì ne citùpà, Ùdì ne Mukàjì-musèla, ne Logos umwèumwè awu, Dîyì edi dìdì kadiyi mwà kushintuludiibwakù to, didi dilàadila maèkèleeziyà leelù ewu, ùteeta bwà kwaluja Dîyì ku dimwèneshiibwa dyàDì mu kaabujimà. Bìdì ne, ba—bapròfetà bàvwa byambudi byà Dimiinu adi, ne màngumba a èkèleeziyà àvwa mbyambudi byà Dimiinu adi bwà mpindyewu. Mpindyewu mònaayi, lùkàsàlùkàsà, kadi ànu mùdì cizubu cyèla kàpa, ne cishààla cikwàte Dimiinu mpindyewu, pashìishe cìdishiya.

⁸² Yesù ùvwa Nzambi. NcìvwaYe. Tatwèndè ùvwa Logos munène awu Yèyè mwinè. Ne Yèyè kàvwa mwà kuCìcìkijia cyònsò mu Mòsà to, bwalu yèyè ùvwa mupròfetà.

⁸³ Ne Dîyì dyà Mukalenge misangu yònsò, kaditu dipangila nànsha, ditu ànu dilwa kùdì mupròfetà. Kakwènakù mwaba nànsha wùmwe, cikondo nànsha cimwè, mu Bible, anyì kacya ku cikondo cyà Bible, cikaadiku dyumvwija dijaalàme dyà Dîyì dilwè kùdì mwena tèòlòjì to. Kacyèna mu Mifundu to. Kacyapù Bafaalèsà, kacyapù Basadokà, ne kacyapù Nzambi kàtukù mwanjì kujuudila mupròfetà munkaci mwàbò to, ne kacyapù Yèyè kàtukù mucyènzè mu matùkù a ndekeelu aa to.

⁸⁴ Pàvwàbo ànu ne bàcìjuulù, bàvwa bònsò bàdisanga bàcìvwija bulongolodi, pààcì cyumba cìfwa. Kadi mmu kiipàcìlà kampànda mùvwàYe wènzà cyòcì eci. Netùteetè kucyùmvwija,

bu Nzambi mwà kutwàmbùlwisha. Mònaayi, mònaayi kaaba aka mùdiye mufwànàngàne, èkèleeziyà, dimiinu adi mpindyewu, diya too ne ku dikàfwànàngàna ne Dimiinu Dyôdi diinè.

⁸⁵ Mpindyewu nudi numòna ne, pàdì dimiinu diya mu buloba, ndimiinu dyà ku cibangidilu. Pàdìdì dītòloka, didi dipàtula mwoyi. Kàdi mwoyi wùdi wènza cinyi mu dimiinu dyà blé? Kadyèna dipàtula cicolakola cìmwècìmwè cyà blé aci dyàkàmwè, anyi lutete lùmwèlùmwè lwà blé alu to. Mmwoyi wà blé, kàdi wùdi mu citùpà cyà cyambudi. Nènku aci civwa ndilongolola dyà kumpàla, pààkapàtukà Luther mu mīdimà yà cìmvundù cinène aci. Bìvwa bikèngela kufwàci.

⁸⁶ Misangu yàbùngì menemene, bantu bàdi bùmvwilangana luse. Kaa, s'ndi mubalè mukàndà ànu àbìdì àdi panshi aa, pa: *Nzambi Mupùwe*, mufùnda kùdì bàmwè bàà ku beena nkindì bàà cyena-leelù bàdi bàteeta kukuseeswisha kule ne Nzambi aba. Wèwè kuyi mumanyè Dìyi dyà Nzambi ne ndongamu wa Nzambi to, udi mwà kunyungishiibwa mutù ànu bipeepèle nùnkù. Kàdi paùdì umòna ndongamu wà Nzambi, ndongamu Wendè, dībà adi ku diitabuuja udi mumanyè ne n'Nzambi; ne Nzambi ùDimanyisha, wènza ànu cyàkenzàYe mu—mu bikondo bikwàbò abi, wènda ùya, ùjaadika.

⁸⁷ Ki bwà cinyi Mòsà kàvwa mwà kunyùngishiibwakù to. Yèyè wàkaakula cìmònààmèèsù ne Nzambi, ne Nzambi kumwambila ne: “Mèmè Nguvwa ne Abraham kuntu kwàka awu. Mèmè ngWàkafila mulayi ewu awu. Mèmè nèngìikalè neebè.” Mmunyi muwìmanyikà muntu awu dībà adi?

⁸⁸ Bu mwàkambà mupròfetà wa kale awu ne: “Ntambwe yèyè mukungùle, wabènga kuumvwa bwòwà nganyi? Ne Nzambi nyewu wàkùlù, wabènga kwamba cipròfetà nganyi?” Patùdì tumòna bintu bìdì Nzambi mulayè bwà dībà edì, tubimòna bìvùnguluka, mmunyi mùdì mwà kushààla mupùwe paùdì umòna ne aci ki njila Wendè? CyàkambàYe aci, s'ncìvwa mwà kwenzeka. Numòna bintu byònsò bìdì kabìyi byùmvwika abi, kàdi's bìdì ànu menemene mwàkambà Nzambi ne nebyènzekè amu.

⁸⁹ Mpindyewu mònaayi, “yèyè mukàjì,” cyambudi aci. Mpindyewu, Hagàà wàkapàtuka bu cicolakola, ne pashiishe kulwakù cizubu, ne pashiishe kulwakù Dimiinu. Mpindyewu tàngilàayi byambudi ebi, ndi muswè bwà nwǎnjì kutàngila, dyàmbedi.

⁹⁰ Mpindyewu, cicolakola kī ncifwànàngànekù ne Dimiinu to nànsa kakesè, kàdi Mwoyi wùvwà mu Dimiinu awu ngùdì mu cicolakola. Ûvwa n'Luther. Mpindyewu, kaacicolakola kakesè aku kàdi ne tubèjì twàbùngì; cyàkuumuka ku Luther, kubwela mu Zwingli, ne ànu nànkù too ne ku Calvin ne bakwàbò bààbùngì.

⁹¹ Mpindyewu mōnaayi, pashìishe, kushintululaci mwaba wàci. Tangilàayi mùdi bufùki mpindyewu, bùdifwimba too ne ku Dîyì dyà Nzambi, mùdi dîbà: lufù, dijiikiibwa, ne dibìikà dyà ku lufù. Pashìishe kulwakù bungungu bwà bilòngò, awu ùvwa ng'Wesley. Ne kupicila aku kulwapù tuubungungu tukesè twà bilòngò twàbùngì tulembèlèlepù, tùvwà cyà bushùwà tufwànàngàne ànu bikolè ne Dimiinu kutàmba mùvwà dibèjì adi, pa blé anyì ditalà. Tùvwà tutàmbe kudifwàna; bwalu, Wesley ne Dîyì diibìdì, Dîyì diibìdì dyà Nzambi, ùbàndisha èkèleeziyà Wendè, wàkapicila mu dijidiibwa. Ki cìvwà wendè mukenji. Èyo.

⁹² Pashìishe, paanyimà pàà mutanci, aci kumata e kubwela cyàkàbìdì mu cìkolakola, ne kutwàlacì mwepu wà blé. Kàdi kumpàlà kwà mwepu ewu kubangawù, kùvwà dinyùkushiibwa, cizubu, cibwikidi, kazubuzubu. Ne mudimi yònsò wa blé ewu, mudimi wa matalà, wèwè mwondolè mwòmò amu ne mupàtùle mwepu wà blé awu anyì wà ditalà, newèlè meeji ne kaacintu kakesè—kakesè kàà kumpàla aku ki lutete lwà blé alu. Kàdi, mpindyewu, ki cikondo cyà beena Mpenta ncyôci aci. Mpindyewu kwèna mwà, wèwè, mwena tèlòlòjì kanà yònsò ewu anyì. . .

⁹³ Mulongi wa maalu-malonda kanà yònsò ewu, èyowà's wè, mmumanyè ne abi mbikondo, mùshindù wàkalwàbi awu. Angàtaayi Mukàndà wà—wà Bwàkabuulwibwà, angàtaayi bikondo byà èkèleeziyà, kàdi nùmonè ní kabyèna ànu menemene mùshindù wùdìbi bìvùnguluka awu.

⁹⁴ Mpindyewu, ku Wesley nkwàkalwà ba-Pèlerins de la Sainteté, ba-Nazaréens, ne èkèleeziyà yònsò yà cijila yà mikesèmikesè ayi, mifwànàngàne ne Dîyì bikolè kutàmba mùvwà dilongolola dyà Luther adi. Kàdi, nudi numòna's, Luther pààkadyènzàye bulongolodi, ki cyàkabangà ànu tubèjì atu ncyôci aci. Nènkù pààkajuukà cyôci eci, Nyumà yònsò wàkuumuka mu èkèleeziyà wa ba-Luthériens awu, bònsò pa kuumusha ànu cyena-màngumba, ki beena kwitabuuja balelèlà bàà menemene abu kubwelabò mu dijidiibwa.

⁹⁵ Ne pashìishe pààkatentemukà dijidiibwa, ba-Pèlerins de la Sainteté, ne bikwàbò, ne malongolodi ônsò a ba-Pèlerins de la Sainteté, a ba-Nazaréens, ne bikwàbò, Cyôci kupàtukamù, kubwela buludi mu cikondo cyà beena Mpenta eci. Nènkù tàngilàayi lutete lukesè alu mpindyewu, lwà blé alu, ndufwànàngàne misangu mùllyô mujimà ne blé wa ku cibangidilu awu, wàkabwela mu buloba awu, kutàmba mùvwà cìkolakola anyì bungungu bwà bilòngò amu. Kàdi bu wèwè mwà kusòmbela panshì, kucitèèka mwìnshì mwà lumwènù, ne kukàngula tuzubu tukesè atu, tùdi kàbìdì ànu twambudi cyanàànà. Lutete kî ndwanjì kubanga to. Nkaalutòngà kakesè menemene ànu mu ndekeelu mwàmwa, wèwè ne lumwènù lunènè lwà bukolè budyundishi udi mwà kumòna kaalusongo

kakesè aku, kenzè bu lusongo lwà mpengèlè, ki dimiinu dilwalwà adi. Nènku cizubu cidi cimwèka ànu menemene bu cintu cilelèlè eci, kî ncintu cilelèlè aci to. Cidi ànu matrice cyanààna.

⁹⁶ Byenzè bu matrice a Màriyà awu. Màriyà kî nguvwa Dimiinu adi to, mu cifwànyikijilu cyà cokolakola eci. Yèyè ùvwa ànu cyambudi cyàDì cyanààna, mùvwà bikwàbò abi amu. Kàdi ciikàlè cibìikidiibwe ne cisungùdiibwe dyàmbedi, kùdi Nzambi Yèyè mwinè, bwà kiipàcilà aka, civwa citàmbe kumwèka nànkù mu mùshindù wà balundà bèètù beena Kàtòlikè bafwànyine kwela meeji ne, yèyè nguvwa mamwèndè wa Nzambi. To, yèyè kàvwa mamwèndè wa Nzambi nànsa, anyi kàvwa mene Dimiinu dyà Nzambi adi to.

⁹⁷ Mukàjì ùdi ùtwàla diyi. Nzambi ngudi utwàla mwo—mwoyi. Mwengùngù, mashi, àdi mu mubidi wà bulùme.

⁹⁸ Cikuka cyà nzoolo cidi mwà kwela diyi anyi nyuunyi ùdi mwà kwela diyi, mu muvù wa bintu bitòlòka kwibaka diswa dyèndè, kàdi, nyuunyi mukàjì awu yèyè kàyi mupetàngàne ne nyuunyi mulùme to, kadyàkutooyika to. Ndifwè. Nedibolelè ànu mu diswa amu mene.

⁹⁹ Ànu múnkaadi mwambàmbe ne, ki lutàtù lùdi naalù maèkèleeziyà leelù ewu, bàdi bàbolela ànu mu diswa amu mene, bàbìikidiibwa ne mba-Méthodistes, ba-Baptistes, beena Mpenta, ne bikwàbò. Bòbò kabàyi bapetàngàne ne Dìyi to, Dyòdi diinè, bàdi bàbolela ànu mu diswa mene amu, mu bulongolodi bwàbò abu.

¹⁰⁰ Mpindyewu, mpindyewu bàmwe bàà kùdibo bàdi bàmba dîbà adi, beena Mishòonyi mu mùshindù kampàndà bàdi bìitabuuja ne Màriyà ngwàkatwàla diyi adi. Byòbì nànkù, tàngilààyi nùmonè cinùdi nwenzeja Yèhowàh Nzambi aci. Diyi kadyèna mwà kutwàdiibwa kakùyi masansakata to.

¹⁰¹ Pa nànkù, nudi numòna's, Nzambi ngwàkenza byònsò bìbìdi diyi ne civuba, Wàkafùka byònsò bìbìdi mu matrice a Màriyà amu. Nènku Muntu awu ùvwa ànu Nzambi Yèyè mwinè wàkavwijiibwa mubidi ne kusòmbela munkaci mwètù awu, Èmanùwèlè, kàyi ànu muntu wa maalu mimpè, mupròfètà cyanààna to; Ùvwa Muntu wa maalu mimpè ne Mupròfètà; kàyi mulongeshi, mwena tèlòlòjì to. Kàà, Yèyè ùvwa mufwànyine—Yèyè ùvwa mufwànyine kwikala byònsò abi; Ùvwa Byònsò-mu-Byònsò. Kàdi kumutù kwà byònsò abi, Yèyè ùvwa Nzambi Yèyè mwinè. Bible mmwambè ne: “Tudi basungìdiibwe ku Mashi a Nzambi.” Nzambi Yèyè mwinè, kàyi mupèrsonà mwisàtù anyi mupèrsonà mwibìdi to. Mupèrsonà awu, Nzambi Yèyè mwinè, Yèhowàh munène awu, ngwàkabwikila Màriyà mundidimbi Wèndè; nènku Mufùki awu, ngwàkafùka ne kabùlù kàà mashi aku, ne mwoyi awu, kàbìdi ne diyi adi.

¹⁰² Bu wèwè mwà kufikisha mwena Yudà ku dimòna aci, wèwè...yèyè's mmumanyè ne Maasiyà ùdi Nganyì.

Pàakondopiibwà John Rhyn awu ku Benton Harbor kwàka, ùvwa mpofo munda mwà bidimu makùmi ànaayi. Laabi awu kunkonkayè, wàmba, mvwa nendè mu muyiiki wà bàbìdì, kwambayè ne: “Kanwèna mwà kukòsolola Nzambì mu bitùpà bisàtù kàdì kuMupèesha mwena Yūdà to.”

¹⁰³ Mémè ne: “Bàmwè bantu mbàtù bàcyènza. Kàdì twètù katùtù tukòsolola Nzambì mu bitùpà bisàtù to.” Mémè ne: “Udi witabuuja bapròfetà anyi?”

“Cyà bushùwà’s, mémè’s ndi ngiitabuuja bapròfetà,” mwàkambàye.

¹⁰⁴ Mémè ne: “Yeshààyi ùvwa wàkula bwà Nganyi, Yeshààyi 9.6 awu ne, ‘Mbatùlèlè Mwàna’?”

Yèyè ne: “Mòna’s, s’cìvwa m’Maasiyà.”

¹⁰⁵ Mémè ne: “Mbulongu kaayi bwikalàku pankaci pàa Maasiyà ne Nzambì?” Ki aci kukòsaci bwalu’s. Mémè mpindyewu kwamba...

Kwambayè ne: “Yèyè neikalè Nzambì.”

¹⁰⁶ Mémè ne: “Cyà bushùwà menemene. ‘Dìnà Dyèndè nedibiikidiibwè ne Mubedyanganyi, Mfùmù wa Ditalala, Nzambì wa Bukolè, Taatù wa Kashidi.’”

¹⁰⁷ Pòpò apu ki pàdì ba-Unitaires bacipangìle, ki pàdì ba-Trinitaires bacipangìle, nseke yònsò yìbìdì yà njila. Kàdì nkàcìnkaci wa disànka ùdì ànu pankaci menemene apu. Bu Nzambì mwà kwikala Taatù Wa Yèyè mwinè, bu ne Yesù ùvwa Taatù Wendè Yèyè mwinè, Kàvwa mufwànyine kwikala aci to. Ne bu ne Ùvwa ne taatù mukwàbò pa kuumusha Nzambì, Bible pèndè mwambè ne “Nyumà Mwîmpè” nguvwa Tatw’Èndè, ne piikalàbo nyumà yibidì mishiilàngàne, Yèyè’s ùvwa mwànà mulela mu masandi. Ncyà bushùwà’s. Ùvwa Tatw’Èndè ki nganyi, Nzambì anyi Nyumà Mwîmpè? Paùdì wamba ne nkampànda kàdì tàngilà mùdìbì bikwenza bundù. Nzambì nguvwa Tatw’Èndè. Ncyà bushùwà anyi?

¹⁰⁸ Maatààyi 1.18, M’Mwämbè ne:

Mpindyewu dilediibwa dyà Yesù Kilistò dyàkenzeka mùshindù ewu: Pàvwà...mamwèndè Màriyà mubangila kùdì Yòzefù, kumpàlà kwà kushààlabò pàmwè, wàkasanganyibwa ne difù dyà kùdì Nyumà Mwîmpè.

¹⁰⁹ Mpindyewu Tatw’Èndè Nganyi? Nwamònu’s, nudi bumvwè cìndì muswè kwamba aci anyi? Mònaayi.

...Yòzefù bàyèndè, bu mùvwàye muntu wa maalu malulàme...kàyi muswè bwà kumunyangila luumù kumpàlà kwà bantu to, wàkeela meeji bwà kumubènga mu musokoko, mu mùshindù ewu.

Mònaayi, pàvwàye wèlangana meeji pa maalu aa, . . . mwanjèlo wa Mukalenge wàkamumwènekela mu cìlòtò, wàmba ne: Yòzefù, wèwè mwànà wa Davidi, kùcìnyi bwà kwangata kwèbè. . . kùdì Màriyà mukàjèbè to, bwalu udi mwimicìibwe munda mwèndè awu ngwa kùdì. . . [Disangisha didi dyàmba ne: “. . . Nyumà Mwîmpè.”—Muf.]

¹¹⁰ Pàànyi's mèmè mvwa ndyàmbidila ne mbambè ne, “Nzambi Taatù nguvwa Tatw'Èndè”? Kaa, beena tèòlòjì wa yààya, dyumvwa dyènù dyèpi?

Mònaayi: “Nekwikalè Bukènkè lwà ku ibaamulòlò!”

¹¹¹ Dimiinu dilelèlè dyàkapàtukila kùdì Màriyà, kàdi kadìvwa Dimiinu dyèndè yèyè nànsa. Cìvwa mmulayi wà Nzambi, mu mùshindù wà ne yèyè wàkamba ne: “Musadidi mukàjì wa Mukalenge nyèyè ewu.” Byambudi byà mwoyi bìvwa mbakàjì. Nènku mpindyewu, Màriyà, Dimiinu ditàmbe kwikala difwànàngàne.

¹¹² Bìvwa bikèngela bwà Hagàà kudipetayè mu mùshindù wà munyangakaja. Sarah yèyè, wèla cintu aci mpatà, kucipàtwilayè ànu ku dimiinu dyà mubidi, dijinga dyà disangila dyà mulùmè ne mukàjì. Kàdi Màriyà, kakùyì disangila dyà mulùmè ne mukàjì to, kwitabuujayè Dìyì, ne Dìyì dyàkavwijibwa mubidi.

¹¹³ Kàdi mònaayi, bu mùvwà Màriyà mutàmbe kufwànangana, wàkalama Dimiinu mu matrice èndè, ne kumwènekabi ànu bu ne òvwa n'Dimiinu dyèndè yèyè. Ki mùdì kàbìdì beena Mpenta. Nèngàalukilè bwà kujìkula ngoma. Kàdi vùlukààyi ne, Yesù mmwambè, mu Maatàayi nshapità wa 24, mvensà wa 24 ne: “Mu matùkù a ndekeelu, nyumà yibìdì ayi. . .” Mpindyewu, kì mmu matùkù a ku ntwàdijilu to. “Mu bikondo byà ndekeelu, nyumà yibìdì ayi neyìikalè mifwànàngàne menemene mu mùshindù wà mifwànyine kuseeswisha ne basungula mene bu ne bìvwa mwà kwenzeka.” Nyumà wa beena Mpenta, mufwànàngàne ànu menemene ne cintu cilelèlè, bipwàngàne bikolè mu mùshindù wà bifwànyine kuseeswisha ne basungula mene bu ne bìvwa mwà kwenzeka.

¹¹⁴ Mpindyewu, awu kì mmèyì àànyi mèmè to. Aci ncyàkambà Yè Yèyè. Mpindyewu, paanyimà pàà cikondo kampànda, pàmwàpa nenùpetèku dyumvwa dyà cìndì nteeta kwamba aci. Mpindyewu ncyà bushùwà ne Dimiinu adi òvwa ditàmbe kufwànangana. . .

¹¹⁵ Cizubu aci cìvwa citàmbe kufwànangana ne Dimiinu, mu mùshindù wà citàmbe ne mùvwà bungungu bwà bilòngò, ne kutàmbe ne mùvwà cìkolakola amu, kàdi bòbò abu bàvwa ànu byambudi byà Dimiinu adi. Nwamònu's, Luther kudìvwijayè bulongolodi, cìkolakola aci kufwàci; Wesley kudìvwijayè bulongolodi, bungungu bwà bilòngò abu kufwàbu; Mpenta kudìvwijayè bulongolodi, mwoyi kufwàwu. Nènku mpindyewu

Dimiinu dīdi dipātuka. Kwēna mwà kuya kulè kutàmba Dimiinu to.

¹¹⁶ Mònaayi, munda mwà bidimu byònsò abi, pàdì nkwa munène ùjuuka, ne lùkàsà lwònsò paanyimà pàa yèyè awu bulongolodi bùdi bùlwa. Bidimu bu bìsàtù nànkus ki bitù ditàbuluja dìnènga, pashìishe bàdi bàcìvwija bulongolodi, ne bènza bulongolodi. Bikèngela kùpatukè byàbùngì mu cyôci aci; bu mùvwà byàbùngì mu Luther, tubèji atu; ne byàbùngì mu bungungu bwà bilòngò, Wesley; ne mabèji a beena Mpenta àpātuka, ba-unitaires, ba-binitaires, ba-trinitaire, ba-quadrinitaires, ba-quinquenitaires. Kaa, luse wè! Nwamònu anyi?

¹¹⁷ Kàdi, mònaayi, bidimu makùmi àbìdì byà Yesù Kilistò mumwènèshìlbwe's! Bulongolodi nànsha bùmwe kī mbujuukèku, ne kabwàdyàkujuukakù to; nebùfwe ànu mwàkafwà nkwa ne nkwa wa mvùla mushìishe yònsò awu amu, ne bikwàbò byònsò. Eci ncikondo cyà nshìikidilu, Dimiinu, ne kadyàkushààla dipyànyi pàmwe ne cizubu to, ànu mùvwàbi ne Ishàmèlà kàvwa mupyànyi pàmwe ne Izàkà amu.

¹¹⁸ Mònaayi mwab'ewu mpindyewu mudici cìfwànàngàne, cìfwànàngàne menemene bwà kuseeswisha. Luther, cìkolakola; Wesley, mwepu; ne Màriyà, cizubu, anyi matrice, anyi Mpenta. Mùshindù mwìnè wùndi mufwànyine kwalabala mwaba ewu mene pa cizubu aci, bwà kunùleeja's. Munda mwà cikondo cijimà, kacya kacitukù cìfikè ku difwànangana mùkaadici mpindyewu emu to. Byònsò bikaadi ànu èkèleeziyà, èkèleeziyà, nwamònu's, "mukàji."

¹¹⁹ Kàdi mònaayi, cìvwa "mukàji," ku cibangidilu, wàkeela mulayi wà ku cibangidilu awu mpatà. Kacìvwa ne n'Nzambì mwangàtùlùle Dìyì Dyèndè to. Nzambì kēna munkaci mwà kwangatulula Dìyì Dyèndè leelù ewu to; Ùdi munkaci mwà kushindika Dìyì Dyèndè dyà ku cibangidilu adi! Kàdi Sarah wàkamba ne: "Pàmwàpa, ku mpùukàpùukà's; tudi bindile's."

¹²⁰ Ki lutàtù lùdi naalù bantu leelù ewu ndwòlò alu, udi uteeta kubànda mu cintu cyùdi kùyi mumanyè ne mmu cinyi mwìnè mùdi ubànda. Mmunyi muwàcyènzà paùdi kùyi mumanyè cyùdi wenza? Udi wenda bu bakuswike cilàmbà kwìsu anyi? Ùteeta bwà kubànda mu cintu kampànda cyùdi kùyi mumanyè cyùdi wenza to, s'neùdishindè. "Mpofò yèyè ùlombola mpofò, bùbìdì bwàbò bàdi bàpòna mu mùkìdì," Yesù's ngwàkamba dīyì adi.

¹²¹ Kàdi mpindyewu tudi biimàne pa dībà dyà Dimiinu. Mpindyewu Dimiinu nedìshaalè dikwàte, (Cinyi?) ditwa nyama ku mikòlò, dikwàcishangana mu mudimu ne Dimiinu munkaci mwà kuDikwàta. Cyàkatèèkiibwa mwaba awu mu kiipàcilà aku, bwà kuDikwàta.

¹²² Bwalu, pàdì dībà dibànda mu muvù wà bintu bitòloka, pa blé apu, tàngilàayi bufùki bwònsò mu muvù mujimà

awu, mu ditùkù dijimà, byònsò bilondangana ànu mu byôbi menemene, pàmwè ne Nzambi. Mpindyewu pàdi dîbà dyà luuyà adi dîbanga kutùma nsèsà pa dimiinu, s'didi dîbwayika. Kàdi bìdi bikèngela bwà buloba kwikalabù bwimàne mu ngiikàdilù kampàndà bwà kufikisha dimiinu adi ku dibwayika mu buloba amu. bikèngela bùyungulukè mu mùshindù ewu, ne bwikalè mu ngiikàdilù kampàndà bwà kufikisha dimiinu adi ku dipàtuka. Byàkakèngela bwà kulwabù mu mùshindù awu, bwà kudipàtwisha mu... pa cikondo cyà mîdimà.

123 Bàmwe bantu...mudyudi ùmwà mwambè ne mmufùnde mukàndà ne, *Nzambi Mupùwe* awu, wàkamba ne: “Mu bikondo byònsò byà mîdimà amu, bantu bàvwà bàvwà bafwile diitabuuja bakwàte ne byà luse abu bààkafwà, kuya mu buloba, beena Kilistò abu, kàdi Nzambi musòmbè mu Dyulu byenzè bu ne bwalu kabùvwa nansha buMutàngile to.” Mòna's, muntu udi kàyi mumanyè mukàndà mukwàte ne byà luse ewu, mufofomija, mufofomija mu nyumà, mèsù èndè ìkalakù ànu matàbaja's wè! Kwènàku mumanyè ne bìdi bikèngela bwà dimiinu adi dimatè mu buloba, bwà kufwàdi ne kuboladi, kumpàlà kwà kuvùlanganadi cyàkàbidi anyi?

124 Ne èkèleeziyà wa mpenta wàkafwà, kupicila ku èkèleeziyà wa Kàtòlikè wa kumpàlà. Ne wàkaalukila ànu mu mmwènekeli wa cìkolakola, kàdi nudikù numòna mùdiye wènda wàngata mbùngakeenu, pa yònsò wa kùdiyi, kupicila ku cikondo cyà ba-Luthériens, Wesley, beena Mpenta amu anyi? Nudi bumvwè anyi?

125 Mpindyewu bikèngela Cyàlukilè buludì ku mudimu wà bwambi wà ku cibangidilu wùvwàYe naawù pa buloba apa awu, bwalu m'Mukàji-musèla. Bàdi umwe. Mpindyewu Yèyè wàkalaya, mu matùkù a ndekeelu, mùvwà bintu ebi mwà kwenzeka. Ne tudi tubimòna byènzeka, mùdi milayì yònsò, Maalàkì 4, Luukà Munsantu 17.30. Kaa, Mifundu mikwàbò bùngi kaayi's wè, s'mbifwànyine kwikala kabiyi ne ndekeelu's!

126 Nènku, kaa, nèngiikalè ne cyà kwimanyika, bwalu dîbà dyàpici. Èyowà. Èyo, wèwè—wèwè bàmbilè, bwà kumòna ní bàdi mwà kupeta...Bàkonkè, wamònu's, ne pashiishe ulwè ùngambilè. Mpindyewu, katancì kakesè cyanàànà. Ndi njinga kujikija eci, ne mwoyi mujimà, nwamònu's. Ndi—ndi muswè nùmonèku eci, ne mwoyi mujimà. Tàngilàayi, Yesù...Mònaayi, nwamònu's, Mukàji-musèla.

127 Nansha nànkù, tudi tusangana ne, mu eci cikondo citùdi ne mwoyi mpindyewu eci, nwamònu's, ne matrice awu, bulongolodi bwà beena Mpenta abu, mbufwànàngàne ànu menemene ne cintu cilelèlà aci. Kàdi nukààvwakù bamanyè ne, Bwàkabuulwibwà 17, mmubiikile èkèleeziyà wa Kàtòlikè wa cyena-Loomo, bulongolodi bwà kumpàlà abu ne, “mukàji wa masandi” anyi? Mbanganyi bàdi bamanyè ne aci ncilelèlà? Mbanganyi bàdi

bamanyè ne yêyè ùvwa mamwëndè wa bandumbà? Mukàjì wa nsòmbelu wa masandi nganyi? Mpindyewu, Yêyè mmwambè ne yêyè mukàjì ewu ùvwa “èkèleeziyà.” Mukàjì wa masandi nganyi? Mmukàjì udi kàyi ne lulamatu ku mucipù wëndè wà dibàkà to. Ndumbà nganyi? Cintu ànu cyòcì cìmwècìmwè aci, mwakù wùmwèwùmwè awu’s.

¹²⁸ Mpindyewu, yêyè awu mmulelè. Dilela dyà mùshindù kaayi diinè adi? Kadiyi dyà ku Dîyi to, kàdi dilela dyà bulongolodi. Ba-Méthodistes mbôbò aba, ba-Baptistes, ne beena Mpenta, ne bônso mbangàte biibidilu byà mamwàbò. Mukàjì kanà yônso wa ngiikàdilu mibi mu Californie emu’s ùdi mwà kulela mwàna wa bakàjì virgò; ne ki bwà cinyi mukenji wà kumpàlà wàkalwa, kàdi pàakaleejibwà bulelèlè kùdi cikondo cyà Luther, bwà dijidiibwa abu, yêyè kàvwa mwà kubwàngata to. Pàvwa dibàtiiza dyà Nyumà Mwimpè dyanyishiibwe, anyi dileejibwe kùdi ba-Méthodistes, bôbò kabàvwa mwà kudyangata to. Nènku mpindyewu, pàdi cikondo cyà Dimiinu cipàtwile Mpenta, yêyè kèna mwà kuDyangata to, yêyè mmudivwijè bulongolodi, kàdi ùvwa cyambudi cyà Dimiinu, nwamònu’s.

¹²⁹ [Mwanèètù wa balùme kampàndà ùdi wàkula mu mwakulu mukwàbò. Katùpà kàà mukàbà wà mèyi munda mutupù—Muf.] Amen. Mpindyewu twasàkidila kùdi Mukalenge bwà aci, Dîyi, bupwekèlè bwà Dîyi divwa dyambiibwe.

¹³⁰ Nwamònu’s, mbipeepèle ànu menemene, ànu bu mu eci, ànu bu mùdi kutàngila blé ùkola. Kabyèna bìkèngela bwà wèwè kwikala ne dyumvwija dyàcì dinènè dyà tèolòjì nànsha. Cìtàngilaayi ànu cyanàànà. Nudi...Yêyè ùdi ànu mu nyungulukilu wenù mene emu, díbà dyônso. Nwamònu’s, kùdi...cidi...

¹³¹ Bìkèngela ngìmanyikè. Ndi muumvwè bànkòka ndambù, ne mémè nguvwa mumulòmbe bwà kwenza nànkù. Bìkèngela twimanyike. Mpindyewu, mwanèètù, ànu dîyi dimwèpelè edi, pashiishe nénye.

¹³² Tàngilàayi, mpindyewu. Cizubu, cicolakola, ne bikwàbò, bìdi ànu byambudi byà Dîyi. Bàvwa ne citùpà cyà Dîyi, nwamònu’s, too ne pàakayàbo mu buloba; dibingishiibwa, dijidiibwa, dyalujulula dyà mapà mu—mu beena Mpenta. Kàdi mōnaayi mpindyewu. Ànu mwàkadibi bwà Ishàmèlà, Izàkà, nwamònu’s, ne pashiishe bwà Yesù; nwamònu’s, umwe ùvwa munyangàkàjibwe, umwe ùvwa wa ku cibangidilu, nènku ki Dimiinu Dyòdi diinè dilwalwà edi. Nwamònu anyi? Mpindyewu, èkèleeziyà mmufùmìne ku cintu cìmwècìmwè aci, mwalùkile buludì. Bu mùdi cilòngò anyi cintu cìkwàbò kanà cyônso eci, cidi cìnwa, cikòka, ne cìya...

¹³³ Aci kî mbwena kwamba ne ba-Luthériens mbajìmine nànsha. Ba-Luthériens bàakabènga dijidiibwa abu, mbafwànyine kwikala bajìmine, aba bàdi baswè kushààla

bakwàte ku cintu kampànda. . . Nwamònu's, Izàlèèlà wàkadyà manà mapyamàpyà dilòòlò dyònsò, nwamònu's. Mònaayi.

¹³⁴ Kàdi mpindyewu ku cikondo cyà nshìikidilu, tàngilàayi cizubu eci mwaba ewu, mpindyewu mònaayi, mu blé emu. Bwalu-busokoka mu kaabujimà bwà—bwà Mwoyi mbutwibwe citampì munda mwà cizubu aci. Tudi tucimòna mu Luther, cyènda cibànda. Tudi tucimòna mu mwepu, cyènda cipàtuka. Tudi tucimòna mu cikolakola. Tudi tulwa apa, nènku cikaadi mpindyewu mu mmwènekeli wa cizubu, mwambè kufwànangana ànu ne cikondo cyà beena Mpenta, kàdi bwalu-busokoka bulelèlà mbusokoka munda amu.

¹³⁵ Mpindyewu vùlukàayi ne, bilondèshile Bwàkabuulwibwà, bwalu-busokoka bwònsò nkòong bwà Mukàndà awu mbutwibwe citampì ne Bitampì Mwamamutekète, bivwà balongolodi kabàyi bapetè mpùngà wa kupàtula to, bitùpà binaayi byà dilongolola abi, bitùpà binaayi byà Nyama yinaayi yàkapàtukà bwà katwilangana ne makolè ànaayi a pa buloba ayi. Wa kumpàla wàkapàtuka, ùvwa. . .

¹³⁶ Cyà kumpàla cyàkapàtuka cìvwa ncinyi? Ntambwe, bwà kutwilangana ne cikondo cyà beena Loomò. Cìvwa n'Dìyi, dyà ku cibangidilu. Yèyè ùdi Ntambwe wa cisàmbà cyà Yudà. Kilistò Yèyè mwinè ngwàkaya bwà katwilangana ne cikondo aci. Nyama uvwa mulondèle wàkapàtuka bwà katwilangana; nyama wàkalonda wàkapàtuka, bwà katwilangana ne mukwàbò mubàndi wa pa kabalù awu, ùvwa nganyi? Nwamònu's, mubàndi wa pa kabalù wa kumpàla awu ùvwa muvwàle bilàmbà bitòòke, ne cifulu cyà butùmbi ku mutù kwèndè, pashìishe, ne bikwàbò, kàdi butà kabùyi ne mikete.

¹³⁷ Mònaayi ne kabalù kiibìdi kààkapàtukà, Nyama wàkaya bwà katwilangana nendè awu ùvwa nngombe. Ngombe nnyama wa didifila. Bàakaya mu buloba mu difwilà dyà diitabuuja mu cikondo cyà mîdimà.

¹³⁸ Nyama mwisàtù wàkaya bwa katwilangana ne kabalù kàvwà kalondèle aku awu, kumpàlà kwà kabalù kàà lufù kubàndakù pa kabalù, lufù ne ifernò, kabalù kàvwà kalondèle kààkayà. . . Nyama ùvwa mulondèle wàkaya bwà katwilangana ne mubàndi wa pa kabalù wa diinè ditùkù adi awu, ùvwa n'Nyama wa kwìsù kufwànàngàne ne kwà muntu. Mbanganyì bàdi bamanyè nànkù? Cikondo cyà beena mamanya a mu mitù, balongolodi, Luther, Wesley, Calvin, Knox, Finney, Moody. Nwamònu anyi?

¹³⁹ Kàdi pashìishe mònaayi, cyàlu kupàtuka ku ibaaumulòlò ncinyi? Mukankù, wa cipròfetà mwalùkile cyàkàbìdi. Nekwikalè Bukénké lwà pa dîbà dyà mukankù, njila wa ku Butùmbi nenùmupetè bulelèlà, Éyì Èkèleeziyà wa Nzambi udi ne mwoyi!

¹⁴⁰ Mvw'a kujingakù bwà kulwa apa ne—ne kusòmbelakù ànu panshì mu dînda kampànda, ne kushààla ditùkù dijimà,

kwenzakù neenù bwobùmwè banyùngùlùkile bintu ebi. Tèèlejàayi, nudi nwela meeji ne ncyèna munùswe anyi? Ndi munùnangè, bâna bèètù wanyì. Ndi—ndi—ndi muswè kuyakù ku bulongolodi ne bulongolodi bwònsò bwà kukwàcishanganakù mu mudim-...ne—ne kwitabuujakù ànu ne muntu ne muntu. Kàdi, nudi numòna's, kabyèna ànu mwa kwenzekakù to. Kakwènakù ciibi nànsha cìmwè cyunzulula bwànyì mèmè to.

¹⁴¹ Ndi mbwela mu mufindifindi mu ditùnga kampànda mpindyewu mene, bwà bwalu bwà bulongolodi, bwalu kî mbaswè kwangishila mudimu wa bwambi wùdì Nzambi...Ndi mubàfùndile dyandamuna ku mukànda, ngamba ne: “Kwènjì bidimu dikùmi bìndì nteeta bwà kubwela. Ne nwènù ne dibatiiza dyènù dyà bupàle adi!”

¹⁴² Umwe wa kùdibo ùdi wìtabuuja ne bìkèngela bwà ùbatìijiibwè misangu yìsàtu; musangu wùmwe bwà Taatù, ne musangu wùmwe bwà Mwànà, Nyumà Mwímpè; cyàdì panshì. Mukwàbò pèndè ne: “To, bìdi bìkèngela bwà ùbatìijiibwè misangu yìsàtù cyàdì muulu: musangu wùmwe bwà Mwànà, musangu wùmwe bwà Taatù, ne Nyumà Mwímpè.” Kàdi bònsò bàbìdì bàdi mu ntùpàkànyì.

¹⁴³ Umwe kwambayè ne: “Yèyè, wèwè udi ubàtìijiibwa mu lufù Lwèndè, ne Yèyè wàkiinamija mutù panshì kumpàla pààkafwàYe. Twètù's tudi tubàtìijiibwa mu lufù Lwèndè.” Mukwàbò kwambayè ne: “Nganyì utukù ùjiika muntu mutwè cyàdì panshì? S'utu umujiika, cyàdì muulu.” Lukutukutu lwà mùshindù awu, bàtàpulula bantu, s'bìdi bìleeja ne mmukàwù. Ncyà kùdì Sàtaanà. Kî ncyà kùdì Nzambi to.

¹⁴⁴ Munkaci mwà nseke yònsò yìbìdì ayi, Nzambi kèna nî nku elu luseke nî nku lukwàbò to, kàdi Yèyè ùdi ùbiikidila ku nseke yònsò yìbìdì ayi ne: “Pàtukàayi munkaci mwàbò, ne ikàlaayi batàpùlùke, mùdì Nzambi wàmba, nènku Nènnwákìdìlè kùndì Mèmè mwinè.”

Nzambi ànùbènèshè.



DIMIINU KADYĀKUPYĀNA PĀMWÈ NÈ CIZUBU NĀNSHA LUA65-0429B

(The Seed Shall Not Be Heir With The Shuck)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu diinâyî mu dindà, mu matùkù 29 a ngondo mwinâyî, cidimu cya 1965, bwà Bwobùmwe bwà Buloba Bujimà bwà didyà dyà mu dindà dyà Beena Kantu-ku-byanza bàà Èvànjeeliyò mu Kaabujimà ku Cilààla-beenyi cyà Biltmore mu Los Angeles, mu Californie, U.S.A. Ndyumusha pa mukaba wa mēyî ne dituuta ku cyamu mu kaabujima kààdì mu Anglais. Nkudimwinu wa mu Ciluba ewu mmutuuta ku cyamu ne mwabanya kùdì Voice Of God Recordings.

CILUBA

©2023 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Dîyî dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwîlà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyî wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org